

云胡百執。視作虛文。長官罔辨賢愚。例分善最。該司寧喻可否。槩以廉能。銓曹例執於權衡。吏科間罕於駁正。勤勞盡瘁。積年方得陞除。瑣碌偷奸。指日亦蒙進秩。官途冗濫。職此之由。茲當莅祚之初。尤切更絃之治。宜如事例。諭爾知之。繼今內外文武官員。任滿九年。無贓犯。應得考課者。該考殿官。遵如前例。詳加審實。某具有材幹。能應務果。非碌碌庸常。旅進旅退者。方許考為稱職。陞賞如例。若某員。雖任滿九年。無贓犯。而其人無有材能。因人成事。不得考課。陞賞。及怠慢惰愚。如珍美局局副阮牢之類。輕貶重降。考殿官敢有徇情妄考。吏部考殿不明。吏科審駁不當。概送刑部。如律治罪。○二十七日。勅清華承司。送勘各處。開墾。挈民家良善。許居住。○御史臺都御史郭有嚴。奏御史衙門體察吏。不敷乞添充。以便體察。從之。○十一月十六日。詔自今。廣南不得竊掠蠻

民。買賣私奴婢。違者許憲司。糾舉治罪。○勅旨。另置廷尉司。先是。洪德年間。例廷尉司屬錦衣衛。天子詔。凡犯重情疑獄。奉鞠勘問。至是。不令屬錦衣衛。仍置指揮使司。指揮同知。指揮僉事各一員。並用儒臣。於是。另置捧文臣重職的當。為之。○令馴象各衛。練象陳于講武庭。并制馴象。差撥旗軍。構作瓦廐。以中城軍人守看。以省逐番構作草舍之費。○作宮牆內粟庫。凡二十連。○勅旨。各衛軍司所軍匠。凡有營造。湊作各務。如有內府武庫祠宇寺觀之類。其該衛司所官及督押員人。敢有箠背要索錢財。及賣放作弊。六科監察御史憲司。及錦衣舍人。體察檢舉治罪。○十二月初六日辛卯。帝遣太保棠溪伯黎永。中軍都督府左都督殿前都檢點司都檢點榕湖伯黎瀾。齎金冊寶章。立皇子濬為皇太子。○十五日庚子。明遣行人司行人徐銍。來諭祭聖宗皇帝。十七日壬

寅。明遣正使司經局洗馬兼翰林院侍講梁儲。副使兵部都給事中王
縝。來齋冊封帝爲安南國王。先是。本月初九日。帝命兵部尙書贛川伯
黎能讓。少保鄭公旦。刑部左侍郎阮克恭。錦衣衛都指揮僉事知廷尉
司使范勉鄰。東閣校書范智謙。大理少卿劉肅。清華道監察御史武達
道。通事武仁脩。阮欽。范瑾。往界首。駙馬都尉陳珪。刑部右侍郎裴原道。
工部右侍郎黎岳。刑科都給事中阮寶珪。往壽昌驛。北軍都督府左都
督華林伯鄭季述。工部右侍郎阮佃。吏科都給事中黎嵩。海陽承宣參
議阮漢廷。往市橋驛。南軍都督府左都督駙馬都尉臨淮伯黎達昭。戶
部右侍郎陳崇穎。御史臺僉都御史黃沆。安邦道監察御史鄭葵。往呂
瑰驛。應接梁儲、徐鉉等。循故事也。二十三日。梁儲、王縝、徐鉉等。並至市
橋驛。是日。帝命東閣大學士覃文禮。學士阮仁浹、裴甄等。就市橋驛。與

梁儲等議禮。二十四日。徐鉉發自市橋驛。就呂瑰驛。帝御小光舟。詣驛
迎接。帝還宮。儲出驛門外望送。語裴甄曰。今日仰見國王。年長眞聖人
相。眞長壽相。實天南生靈之福。何其博學。應事捷敏之速。稱嘆不已。二
十五日。徐鉉發自呂瑰驛。至盛烈津下船。帝詣瓊雲殿。接見。上先還宮。
徐鉉就勤政殿。致祭聖宗皇帝。禮畢。與徐鉉行相見禮。仍命百官。送出
使館。二十七日。梁儲等至敬天殿。行開讀詔書禮。其畧云。奉天承運皇
上若曰。我皇明君臨萬國。統御群方。聲教誕敷。普率漸暨。爾安南爲國
界在南陲。作我藩屏。咸稱秉禮。蔚有華風。故國王灝。恪勤貢職。保民安
社。垂四十年。今屬告終。國統宜嗣。世子鐸。德惟出類。衆所歸心。貢表請
封。意專辭懇。特遣儲等。持節封爲安南國王。於戲崇德象賢。義無間於
遠近。繼志述事。心勿替於始終。尙祈國中耆舊臣僚。同寅協恭。以稱朕

懷來之德。故下詔示。使之知悉。舊禮儀註。無上香無舞蹈山呼。至是儲、縝等送儀註。有之。帝不從。各報儲等遵如舊例。禮畢。帝詣勤政殿。行相見禮。仍命百官送儲等出使館。二十九日。梁儲病。帝親詣館視儲疾。儲出見。是日。帝宴儲等于勤政殿。并賜金銀絲絹。各有差。儲等並不受。固辭歸國。帝作詩以餞之。○立景統二年己未科進士題名碑于太學門。庚申三年。明弘治三年春正月二十五日。帝遣使如明。刑部左侍郎阮維貞。禮科都給事中黎蘭馨。尙寶少卿阮儒宗等。謝致祭。東閣學士劉興孝。翰林院侍書兼秀林局司訓杜綱。通事司丞裴端教。謝冊封。并求冠服。○以郭有嚴爲太常寺卿。○二十七日。戶部尙書鄭季遵。奏議大集軍期差餘。本月以裏納足。清華、乂安等處。及四承宜各衙門。一箇月十日。順化處各衙門。一月十五箇日。廣南處各衙門。二月以裏足。並依期投

狀。戶部度支同錦衣戶科。檢收。○二十八日。以陶舜爲戶部尙書兼知崇文館秀林局。○二月初六日。定追贓罰錢日期令。○十一日。承制鄧俊傳。奉詔舍生會試中三場。并遞年累中場。如訓導有缺者。國子監官。端保有德行儀表堪爲人師者。送吏部銓除。○夏四月初七日。定檢看稅物濫匿還他令。勅旨。繼今。木條船庫廠場門外。公同檢驗。合例者曳入檢收。公同置簿。不合例者將人公同。檢收置簿。其濫匿。一切還他。○以楊直源陞爲都廷尉。初直源爲府尹。彈壓豪強。權貴爲之斂手。黎廣度保有政術。剛毅可陞廷尉。故有是命。○貶東閣校書吳煥充本府軍。坐以朝事與外人言也。後辛酉科。鄉試中參場不與。入肆場。○勅旨。繼今。凡有構作修理。各務當先時。預定工程財物等件。一一備足。量其輕重緩急。漸次營爲。不可一日同作。以舒人力。○戶部左侍郎阮德廣上

言太祖高皇帝起義之初。將臣士伍同心戮力。將臣有大勳勞。並已有封謚追贈。有子孫苗裔。同得承蔭叙用。士伍亦預勳勞。雖賜勅命美文。已受各衛將軍。而子孫猶多屈在軍伍。未得承蔭。臣恐勸功之典。未盡舉也。今陛下光登寶位。德廣乾坤。係從軍得馘許除用。雖引選不取。猶授正官。况開國士伍。間關百戰。凡十餘年。已有功勞。忍使不追贈。子孫不承蔭。何以爲人臣之勸。今臣伏乞順天年。已有功勞。祇受勅命美文。許子孫投告該官。勘實明白。備將姓名具奏。送吏部加贈一級。有子孫苗裔。不識字者。考充錦衣衛。俊士能讀書識字。考充崇文館學生。如功臣例。上以伸聖神山河帶礪之盟。下以篤功臣與國成休之慶也。上從之。仍勅旨。順天年開國。有美文勅命。自三品以上。見獲子孫。已充軍伍各色。許本人投告兵部勘實。軍伍者充錦衣衛。俊士能讀書者。充崇文

館儒生。三品以下。充羽林神臂等衛。○秋八月十五日。御製觀稼亭中秋玩月詩十五韻。命東閣大學士阮仁浹、黎彥俊、黎茂賞、阮冲慤、翰林院侍書阮孫茂、東閣校書鄧從矩、鄧鳴謙、梁得朋、翰林院校理阮垣、武珠。校討阮敏等奉賡。○詔。繼今匠人有缺。至選壯時。取黃丁諳曉各藝。社庄之人。填充。停差人往各處。分擇諳曉各藝。充匠。○冬十月二十五日。阮端奏言。社長勤於訓飭。善俗興行。堪雜流官。本縣州官勘實。呈承憲二司。勾取本社及附近各社社長勘實。具奏旌賞。○砌東邊牆。○定冠帽制。令禮部備榜諸王公侯伯駙馬內外文。武百官儒吏軍色民人等。照所用冠服制樣。遵行。○構作庫廊及親王公主府。
辛酉四年。明弘治十四年。春正月朔。幸西京。禁扈從官。不得使旗軍裝載妻子。女妓隨行。縱情肆欲。○詔管軍匠官督押。公務或有怠惰欠缺。應發落

告所犯。如法懲治。不得以大杖手足。磚塊木椎。親自痛打。違者如律治罪。○以楊直源爲工部右侍郎。○初二日。校定扈從留守事例。凡七條。○夏四月朔。詔興人女丁。前頒賜掖庭并公主等。止許本人正身。若生得子孫。並送官。○五月二十四日。詔繼今。每年至選壯時。某社有貧乏人。不限公田私田。社長預先保結。端供。府縣官覆勘。開在貧乏項。准饒。○秋七月二十九日。詔繼今。各處承應二司官。詳訪府縣等官。所行功過。每至歲終。定爲上中下考。某人愛恤下民。廉勤政績者。爲上考。愛恤下民。徵科不擾。公事無缺者。爲中考。某人碌碌。旅進旅退者。爲下考。承應府縣州等吏。某人有廉能勤敏者。爲中等。某人鄙猥不勤者。爲下等。並類取姓名。詳註事跡。具本送吏部收照。官員通併前滿考九年。如課例黜陟施行。吏典滿年限中等多者。許照例陞充。官吏果有污冗奸怠。

賍賄實跡者。送吏部勘實。如例治罪。承應官果有恩怨賄賂類奏不公。以致善惡混淆。功過失實。科臺等官。體實劾奏送問。其御史臺官亦詳訪各處承應功過。每至年終。定爲上中下考。類奏並如承應官類奏府縣州等官例施行。○詔各府縣等官。有田土猶荒。前已給通。告人耕種納稅如例。若貧乏之人。前已挈家占射開墾別府縣。荒閑田土。例得傳子若孫耕種者。許告勘官移告本縣社。擇得妻妾正身。呈勘官。備類囚人及妻妾姓名。交付某人妻妾。送囚官領去。是日。又命定儒吏除用令。詔華文學生。儒生。按吏。監生。各衙門都吏。已經選取。吏部查實。遞年會試。中場多者先除。少者後除。若無中會試場。年深者先除。淺者後除。不得如前閱選身材行次。一槩混除。違者抵罪。○九月朔。大雨。漲溢城中。○選壯充軍。○定人丁差賦令。諸不具人丁。不能生理。並饒差賦。能生

理。徵身稅半分。○冬十一月十六日。帝遣吏部左侍郎阮郁。東閣校書
丁勳。翰林院侍書兼秀林局司訓鄧鳴謙。如明歲貢。○二十六日。兵部
尚書阮弘碩奏。與人捕得盜劫。應陞賞。次者。並如各衙門應差捕得盜
劫例。陞充。宜達局局人。再能捕得盜劫者。做如衙門都吏。捕得盜劫者。
少賞資。不得陞充。該捕壯士。既不得陞充。則賞資。准在衙門吏不減。從
之。○十二月二十五日。勅旨定鄉試事務施行。一。繼今。鄉試時各處社
長。端保本社士人。除秀林生徒外。某軍色民人。果是良家子弟。有行檢
學問。能屬文。備肆場者。亦許端保。若興化、安邦、宣光、諒山四處士人。備
參場亦許入試。大社二十人。中社十五人。小社十人。某社習學少者。不
拘此例。社長類取姓名。本府縣州逐一覆實。諳寫士人一。場中者。承憲
二司如例考試。若某社長。端供不實。府縣州考覈不明。致士人入試時。

猶雜冗不成文理。并為親戚子弟囑托者。該科臺差人體訪得實。一體
送問治罪。一。繼今。士人入試時。提調、監試等官。責令檢舉。監官公同搜
檢場中。或有藏詩書事實等跡。一切察覓。至士人入試場時。自於門外
詳加檢察。若某抄為事實等。文義懷挾。并代試者。即捉正身送問。前項
犯人充本府軍。三年終不得入場。彌封監不明以貶降罪之。承憲二司。
一體公同檢察。方許入場考試。若某人標試奸跡者。拘留正身舉奏送
問。承憲官敢違容奸作弊。該科臺及差人體訪得實。一體送問治罪。一。
繼今。官員見任。別處承司。并儒生典吏。遇上番。或留京城應務等項。情
願應試者。本人投告覈實。已能行文備肆場者。方許給回本貫應試。不
得如前給所保承司。并奉天應試。違者送問治罪。一。繼今。吏典鄉試中
式者。充國子監留學。一。繼今。鄉試入場。監生生徒守制在家。並就本府

報名。點目欠者。該官具奏充本府軍。擅入試場外門及代試。以徒罪罪之。終身不得入試場叙用。若社長認面時。見奸同情容縱。致代試入場中。有告捉者。充本府軍三項等。○是歲。奉天火災。○令京人逃漂出首過。回藩鎮役。

壬戌五年。明弘治十五年春正月初三日。勅旨。一。繼今。各處縣州官行下各社長。凡本社軍人匠局各色等役。將至大集軍期。上番先行督責令戒。或彼盡去期番。或做工未滿期日。而先逃回。卽究究詰問。責令端供明白。審是頑怠及期番做者。許告縣州官舉奏。送該部治罪。一。繼今。各衛司所有逃亾復業。及老疾民人。每至上番如前令。銷差輕務。若壯健者。如有得病。應務不得。許本伍。亦可納錢。不得奸詐托病。○以刑部右侍郎楊直源爲兵部左侍郎。阮觀賢爲刑部右侍郎。○二月。會試天下舉人。

應試者五千人。取陳翼等六十一人。吏部以其名聞。上親策問。以帝王理天下。命南軍都督府左都督駙馬都尉臨淮伯黎達昭。戶部尙書武有。提調兵部左侍郎楊直源。御史臺僉都御史裴昌澤。監試。禮部尙書左春坊右諭德兼東閣大學士覃文禮。禮部尙書兼翰林院侍讀掌翰林院事阮保。禮部左侍郎兼東閣學士黎彥俊。國子監祭酒何公程。司業黃培。太常寺卿嚴琳。讀卷。上覽。賜第一甲黎益沐。水棠縣人。前命。宜制詞。先捧香火。黎棧。阮文泰等三人進士及第。第二甲阮景演。黎燧。烈。爛。其手。不之覺。黎棧。阮文泰等三人進士及第。第二甲阮景演。黎仁濟等二十四人進士出身。第三甲范謙柄。阮茂等三十四人同進士出身。上御敬天殿。鴻臚傳唱第遞年。黃榜揭于東華門外。至是命禮部捧出鼓樂前導。掛張太學門。黃榜張太學門。自此始。○三月。選黃丁。詔各坊社冊有丁男。自景統四年籍十一歲。今年遞至十二歲。及漏籍黃

丁。身材壯健長大四尺以上。社長類名。送本處三司及奉天府。至農隙時閱選。○夏四月十八日。刑部左侍郎阮觀賢上言。臣欽奉勅旨。繼今。軍匠色。例得放回農務者。五六月、十月、十一月番。並得分半歸農。不得間分秋夏奉此。阮觀賢竊照上年六月、十月番。五刑司獄卒。並停勾訟。今五月、十一月番。軍匠軍色人。分歸農。而五刑司獄所獄卒。暫勾訟。未奏該及。臣謹具奏聞。伏望聖訓。從之。○二十日。勅旨。六部尙書、侍郎、御史臺、東閣、翰林、六寺、六科、承宣使、憲察使等職有缺。史部具奏。取旨施行。○六月十二日。杜綱奉北使回。以爲東閣校書兼秀林局司訓。○秋八月十九日。以杜綱爲禮部右侍郎。○冬十一月。以楊直源爲禮部左郎。○十二月初五日。擬選府衛司所官以上。五府都督檢點還督指揮使都總兵使。如有缺員。吏部具奏。取旨施行。一衛所總知缺一員。例取

管領二員。管領缺一員。例取武尉三員。選取一。吏部類取姓名職色無過犯。具奏內任內府引選。外任指揮。翰林公同都承憲三司選取。備奏銓除。○十八日。遣太常寺卿郭有嚴。監察御史阮秉和。給事中陳茂材。如明謝賜冠服。時明國皇后見我國使至。差官收取函箱。領入內殿。討取異香。郭有嚴原有所買龍袞禁物貯在箱內。恐明國檢得責之。乃作戒本部榜文。收取異香上進。其文曰。匹夫懷璧。麟經貽贖貨之譏。胡賈藏珠。馬史示輕生之戒。故叩闔呈瓊者。嘉忠純之可尙。而進芹獻曝者。雖微小而可稱。歷歷薰蕕。昭昭龜鑑。照得本部使等。率自下方之遠。來觀上國之光。萬里梯航。跋涉寧辭於海島。九霄日月。瞻依快覩於天顏。趁清明文物於虞朝。視禮樂衣冠之周制。尊親在念。報答無階。凡其身隨貨財。豈宜糊心愛惜。某有奇南異香一合。呈付差官。揀裁進入。明主

見其文。謂三代人才。命太監陳寬傳出。閣老李東陽等看。奏云是他一片忠誠。宜加優賞。以示激勸。因問左右。他在國何官。左右以都御史對。明主乃賜宴殿上。賜大紅解豸織金胄背紵絲等物。有嚴因上表稱謝云。臣竊惟天地發育萬物。雖萌芽根莖。猶感生生化化之仁。帝王撫綏兆邦。雖絕徼究氓。猶仰蕩蕩平平之道。今臣忝因夏貢。近望堯雲。仰天日於長安。瞻依正切。則衣冠於王會。欣幸良多。豈圖微遠之餘。疊荷寵光之賜章。小身有耀。品采孔揚。命服匪頌。豸文生色。顧惟草木孤根之陋。尤感乾坤大造之恩。臣不勝仰戴銘佩之至。敬祝皇帝萬萬歲。壽與天齊年。率土臣民。均樂雍熙之治。庶邦大小永孚。漸被之休。是臣之所深願望也。○丙午。建王鑲薨。輟朝三日。賜諡貞靖。○詔。繼今。父安。建安。馴象等衛所。作商船二艘。以便載粟。○阮榮等奉勅旨。光順、洪德年間。

內臣出外。擅到人家者斬。○停常川舍人。選取高大。充錦衣衛舍人。卑小。充外直舍人。

癸亥。六年。明弘治十六年。春正月。旱。初八日。勅諭清華贊治承宣使司參議楊靜等。吾於農務。尤且留意。爾牧兵民。固當盡力。省循無怠。畜洩以時。茲惟善政。永保圖功。書曰。有備無患。此之謂也。除已具奏外。其方曠濼。須先預備隄防。種稼事。彼縣州官。視秦楚肥瘠。忽然予每差內臣。往省南畝。或田畝卑塌。或阡陌荒蕪。或土堆有缺。或翻鵝害苗。纔至數朝。斷不可久。暑未數日。殆甚告乾。皆由分憂之任。不得其才。扞制之方。靡良其策。嗚呼。汝等。以衣冠之美。俸祿之富。爲潤屋之費耶。抑莅天之功耶。吾一身恐懼之勤。而爲爾優游之悅。况今年值運下元。遭逢末劫。玄樞經云。冬至得壬。地赤千里。地母經云。癸亥之年。雨水太多。修築之術。將不

勤乎。汝宜作急部內江關水車小溪大路。期二箇月以裡。爾親來檢閱。完好者。置爲考上課。築漏者。編爲不稱職。詳題以聞。定行黜陟。爾等無情不督責。至霖雨田禾淹濕。詰得其實。一體送問。○初九日。郭有嚴等使明將還。陛辭。明帝遣西夷都督大通事錦衣衛都指揮使楊琮等。宣傳聖旨。賜郭有嚴大紅骨朶雲織金襪多紵絲四疋。熟絲三疋。并兵部尙書曾鑑等。奉抄送聖旨。另給郭有嚴馬船一艘。欽此。郭有嚴謝恩詩云。曾因國事貢珍封。藻宴叨陪王陛中。豸彩已章三品服。鷁舟再駕入荒風。詩辭笑乏寬如海。酒力那堪飲似虹。福壽擬同周雅祝。升恒日月照臨公。○二月十七日。禮部尙書武有奏言。每至大集軍期。投納差餘並老疾等錢。卽備來開所納前項員人姓名。及實錢數人。送戶部照收。○大旱。○夏四月。彗星出東方。○禮部左侍郎楊直源奏。築蘇瀝江

邊。上自札橋社。下至贛川社。防水旱。以利農。並開安福渠下。至上福渠處。以灌民田。○五月初五日。頒題扇詩。御製警之云。星火昏中夜。蓬芒出壁東。荆方當大水。衛地恐興戎。循省允臨理。推占謾異同。○秋八月。御史臺官奏。翰林官肄業怠慢。宜論罰之。○九月初十日。大火。東市燒盡。○冬十二月初八日。以禮部左侍郎楊直源兼翰林院事。○是歲前大旱後大水。傘圓、三島山崩。

甲子。七年。六月以後。肅宗泰貞元年。春正月。詔。繼今。官牆內加修理。各務定。構作廊廟並廊宇舍。○二月。幸西京。○夏四月。帝由往幸藍山。車駕還宮。不豫。五月二十三日。帝以女謁盛。嬰重疾。大漸。乃遺命皇太子。嗣位。二十四日。帝崩于圖治殿。○初。帝作上陽。鑑治。圖治。長生之殿。燕寢之處。讀書齋生之殿。乃在九重之內。作流盃殿。引水至堂前。稱上陽洞

主。生皇子六。長子安王洵。第二威穆帝溶。第三嗣皇漳。第四通王溶。第五明王洽。第六思王養。○六月初六日。中軍都督府左都督屏山侯黎廣度。南軍都督府左都督駙馬都尉臨淮伯黎達昭。暨駙馬、五府、六部、東閣、翰林院、六寺、科、臺等官。詣皇極殿。奉皇太子漳卽位。大赦改元。以是年爲泰貞元年。

贊曰。憲宗好文守成。節用慎罰。修政任賢。敬天勤民。亦賢主也。享國不久。惜哉。

武瓊贊曰。帝天資日表。隆準龍顏。神采異常。聖宗奇愛之。尤聰明睿智。高出物表。而仁慈溫。不爲嚴毅。常朝退。引士大夫。詢訪得失。假以辭色。導之使言。達下情。決壅蔽。臣下過失。薄示戒責。不忍輟加答辱。有所措置。從容間暇。未嘗大聲以色。而天下躉躉從化。每言聖祖

肇造區夏。皇父內修外攘。規模已定。吾無事乎更張。惟遵守成憲。充擴而光大之。以宣昭我祖考之德而已。

肅宗欽皇帝

諱。又諱。憲宗之第三子也。在位未期年。壽十七歲而崩。葬敬陵。帝篤志好學。親賢樂善。足爲承平之

早歿。不幸。

其母。莊順皇太后阮氏。諱環。天施平陵人也。以洪德十九年。八月初一日而生。帝景統二年三月。立爲皇太子。及憲宗崩。遂卽皇帝位。改元泰貞。以生日爲天明聖節。稱嗣皇。後追上尊諡。廟號肅宗。

帝旣卽位。稱嗣皇。告天地宗廟。尊祖母長樂皇太后。爲太皇太后。○秋七月。郭有嚴等奉使還自明。○八月初一日。以生日爲天明聖節。○是月。有長星見西北。○九月初八日。奉寶冊。上大行皇帝尊諡。曰體天凝

道懋德至仁昭文紹武宣哲欽聖彰孝睿皇帝。廟號憲宗。母貴妃爲莊順明懿皇太后。○逆人段世儂等伏誅。時世儂反於高平。捕獲之。及其黨五百餘人皆伏誅。○冬十月十八日甲辰。憲宗皇帝梓宮發引回西京。○十一月初八日。遷葬裕陵。禮官按故事。奏請立碑。帝可其奏。乃命文臣阮仁浹、范盛、程志森等撰碑文。○遣使如明。吏部左侍郎鄧讚、檢討屈瓊玖、戶科都給事中劉光輔等歲貢。兵部右侍郎阮鄰、監察御史阮敬嚴等告哀。禮部右侍郎阮寶珪、東閣校書陳曰良、校理武珠等求封。○是月初八日。帝弗豫。初帝卽位。出囚人。放宮女。停不急之務。減偏重之役。抑貢獻。省力役。任勳舊。攬威權。抑戒外戚。友篤親藩。凡經綸大經。建立大本。無所不用其極。天下臣民皆拭目以觀初政。以爲成康文景復見於今日。○十二月初六日壬戌。帝勅諭朝臣屏山侯黎廣度。贛

川伯黎能讓。及文武臣僚等。朕疾未痊。慮付托重寄。恐有未堪。先皇帝第二子潯。賢明仁孝。可嗣正統。以承祖宗。以撫臣民。大臣百官。盡其忠貞。以輔成大業。某親王僭于天位。天下共誅之。○初七日癸亥。帝疾大漸。八日甲子。崩于皇極殿。遺詔百官喪服。一循古禮。○十八日甲戌。中軍都督府左都督屏山侯黎廣度。宗人令叔恩使黎能讓。暨公、侯、伯、駙馬、都尉、五府、六部、御史臺、東閣、翰林、六寺、六科、提刑、十三道等官。詣興明殿。奉迎憲宗第二子潯。卽皇帝位。大赦改元。以明年爲端慶元年。○時阮寶珪如明。未過關。再改封表文。送與寶珪奉行。○是時頒大赦詔。條于天下。其中進士科。未有除用。而病故者。許子孫蔭如官員例。并入流試官。許饒一男。選丁壯一男。○二十五日。定五城門外作直店例。勅旨五城門外。劾力神武殿前。構作瓦屋二連。每連七間。每日該把門

用一人。出直店譏察。并錦衣肅清員人。亦在夜間。內臣即在臺門內。若一連。神武殿前。効力。用二員。軍二十人。盾五十面。手箭五枝。宿直如法。○二十六日。勅旨五府軍。店外作木柜例。係外店每店相隔。並著木柜柱要大。每店用鈎五柄。有尖頭。頭亦有鈎。置在店兩頭。守把官員軍人。並在直店。不得湊作以別務。

威穆帝

諱。又諱。憲宗第二子。肅宗之庶兄也。在位五年。壽二

荒色立威。怒時稱鬼王。亂徵見矣。

其母。昭仁皇太后阮氏。諱瑾。東岸扶軫人也。少孤貧。自賣與奉天人。其家有罪。沒入官婢。以故得入侍管寧皇后。憲宗為太子時。見有美姿悅之。納以為妃。以洪德十九年。五月五日子時而生。帝泰貞元年。肅宗崩。無嗣。庶母敬妃阮氏。於禁中。定謀立之。

遂即皇帝位。大赦改元。以誕日為天慶聖節。稱瓊都洞主。

乙丑。端慶元年。

明弘治八年。春正月朔。日食。○二十一日。詔各處承宣官員

百姓等。大事用大方紙。小事用小方紙。囑書文契用大紙。不得猶狂用方紙如前。聽一箇月。悉如明令。若官員百姓囑書文契。猶用方紙。許本族人族長投告。驗實以虛論。賣者失其己分。買者失其原錢。囑書文契並不用。○二月十六日甲戌。上大行皇帝尊諡。曰昭義顯仁溫恭淵默。悼孝允恭欽皇帝。廟號肅宗。○十八日丙子。追尊生母阮氏。為昭仁弘懿皇太后。○會試天下舉人。取黎輝唐安幕人等五十五人。廷試。賜第一甲黎輝、裴允文、陳斐彰德芝泥子。三名進士及第。第二甲阮省象、陳磊等十六名進士出身。第三甲范敦碯、阮胥等三十六名同進士出身。○三月。肅宗皇帝梓宮發引回西京。癸卯。葬于敬陵。禮官奏請立碑。帝可其

奏命單文禮、阮仁浹、范盛、程志森等撰碑文。○二十二日。太皇太后阮氏暴崩于長樂殿正寢。年六十五。初。肅宗崩。無嗣。內臣阮汝爲欲立帝。太皇太后以帝婢妾之子。不可以承大統。固要立呂瑰王。於是汝爲諷太后。使出迎呂瑰王。汝爲等乃閉諸城門立帝。太后見帝已立。不悅。後帝遂使左右密弑之。輟朝七日。○二十七日。升祔母昭仁弘懿皇太后于東京太廟明德宮。○是月。化外州透入。爭那巖關田。帝命丹溪伯鄭侑。經理明光地方。立關隘而還。○夏四月二十七日。追尊祖母諡曰徽嘉靜穆溫恭柔順太皇太后。帝建真元殿。作寶瑞堂於東岸扶軫鄉。作宣譽堂於水棠華陵鄉。又作光美殿於廣德隸園坊。以恭奉太皇太后先祖。○五月初七日。明孝宗崩。諡曰敬皇帝。○十三日。命鄭侑往宣光公幹。○二十五日。以誕日爲天慶聖節。○二十八日。明皇太子厚照。卽

皇帝位。改元正德。武宗爲。○以楊直源爲戶部左侍郎兼昭文館。○六月初五日。貶禮部尙書單文禮。御史臺都御史阮光弼等于廣南尋殺之。初。憲宗寢疾。帝母昭仁皇后。以婢妾得寵。生帝而早歿。庶母敬妃無子。養爲己子。意欲立之。恐大臣不從。以金賂文禮。不受。及憲宗大漸。文禮與光弼。受遺詔。輔皇太子嗣位。時諸王爭立。文禮恐變起倉卒。乃入寢殿。取傳國寶歸家。再與文武諸大臣。共立肅宗。卽帝位。帝深憾之。至是以姜种、阮汝爲謀。貶二人。行廣南承宣使。至真福縣大江。帝使人道追逼令自盡。二人當投水中。吟國語詩而沒。後廷臣心知二人死非其罪。爭之。帝歸咎於汝爲。遂殺之。○以黎嵩爲清華承宣使。○起吳煥爲清華憲察使。煥前被充軍。再試中生徒。至是起用。

丙寅二年。明武宗厚照。春。初。仁睦門陳管領。陳姓。缺其名也。本陳朝之外

孫生二女。長曰松。次曰竹。帝聞松有美色。選入後宮。生皇子。而早沒。後竹亦入侍。○二月。選黃丁。○黜范謙柄爲海陽憲察使。時謙柄坐與黎棧、石誌爲朝中所劾。故黜之。○召附翼縣知縣阮貴雅。爲提刑監察御史。先是。貴雅應制落韻。被黜。至是召用之。○夏四月十三日。起復杜綱。仍禮部右侍郎翰林院侍讀參掌翰林院事。以綱丁母憂。始服闋故也。閱音缺。服終曰闋。○冬十二月十二日。遣兵部尙書阮光美。吏科都給事中阮旌。提刑監察御史阮中達。爲提調、監試、監考。考試軍色民人書算於講武殿庭。應考者三萬餘人。取中者阮子棊等一千五百十九人。○改定軍號勇士副軍以下。

丁卯三年。明正德二年。春正月初九日。明遣正使翰林院編修曾鐸。副使吏科右給事中張弘志。來告卽位。并賜彩幣。○以阮敲爲海陽承宣使。初

敲奉北使。有北枕甚好。不以上進。爲舍人所奏。黜還家。至是始用之。後敲卒于任所。○閏正月。明遣行人司行人何露。來致祭于憲宗睿皇帝。明又遣正使翰林院編修沈燾。副使工科左給事中許天錫。齋詔勅。封帝爲安南國王。並賜皮弁冠服一副。常服一套。天錫見帝相。題詩曰。安南四百運尤長。天意如何降鬼王。○覆考書算一百四十四人。中者阮子棊二十五人。充華文學士。○新置強方司。○知府阮贊。被外戚姜种親人打。死復甦。先是。贊仕憲宗時。爲中書監正字。會試中場。以帝外鄉東岸人。除奉天府少尹。後任富平府知府。爲人不屈。姜种親人阮仲。拿于廷尉獄。打死。拋于城外。子孫以席包之。乃歸而葬。忽然復甦。匿于弟子家。日則穴居。夜泊樹上。妻子以他人骸骨葬之。行齋如居喪禮。已經三年。鄉村不知。至洪順己巳年。義師起。詣闕陳辭。許入秘書舍人。賜號

還生偽莫。時官至義興、高平等府知府。○三月。帝拜謁西京。二十四日
 戊戌。還自西京。駐營于春杜行殿。親幸直元殿。顧貼福地。○以阮時雍
 為清華承宣使。○冬十月。遣使如明。戶部左侍郎楊直源。東閣校書
 朱宗文。翰林院檢討丁順等。賀武宗即位。梁侃謝賜綵幣。鴻臚寺少卿
 阮銓進香。工部右侍郎阮璿。翰林院檢討尹茂魁。戶科給事中黎挺之
 等。謝致祭。清華承宣使黎嵩。翰林院檢討丁貞。監察御史黎孝忠等。謝
 冊封。又安參議黎淵。翰林院校理吳綏。監察御史黃岳等。歲貢。

戊辰。四年。明正德三年。春二月。會試天下舉人。取杜鑿音容。鑿舒池人。廷試。
 等五十四人。及廷試。賜第一甲阮簡清、許三省、阮有嚴三名進士及第。
 第二甲陳傑等十五名進士出身。第三甲阮義壽等三十六名同進士
 出身。○以阮伯俊為清華總兵僉事。阮贛為清華憲察使。○三月初四

日。詔內外各衙門都提吏并更番吏。有缺數。吏部照洪德年間例。類取
 應得填充。姓名具本送吏科。抄送吏部。轉送各衙門遵行。○以莫登庸
 為天武衛都指揮使。司都指揮使。登庸平河高堆人也。即至靈縣。其先
 祖莫挺之。陳朝狀元。官至左僕射。挺之生高。高生遂。遂生嵩。移居清河
 蘭溪社。生萍。萍又涉于宜陽古□社。而居焉。萍生檄。檄娶本社鄧椿長
 女。生三男。長曰登庸。次曰篤信。季曰檄。登庸有勇力。以武舉入宿衛。至
 是乃拜是職。○夏六月。以杜細為御史臺副都御史。○戶部左侍郎楊
 直源。還自明。帝以象笏銀帶賜之。○冬十月初四日。下御史臺副都御
 史杜細于廷尉獄。細以言事忤旨。繫獄。尋放之。○黑羅羅國人。侵入朱
 村田關。帝乃以北軍都督府陳叔邁。為右游擊營。副將范一鷄。為記錄
 先行。命美郡公黎炯。為征蠻將軍。掛征蠻將軍印。丹溪伯鄭侑。為副提

領將神武効力殿前中東西南北府各衛軍分爲六營每營一萬人以
三千人運糧往征黑羅羅到朱村田分立界碣尋命焮等經理順化處
水尾朱關地方以修理關隘。

己巳五年

十二月以後順元二年○明正德四年

春二月耕籍田未折○敬天殿乾元

洪鍾蒲牢斷鍾自落○以阮承業兼掌宗人府宗人令子模總領各宿
衛○三月勅征蠻將軍黎炯鄭侑等班師還○帝性好勇因謁郊還宮
乘援雲象頭入東華門令各司及五府公象將入御前引選并類各鎮
公象回于京師選入御象充補各衛○是時新置內臣有飛武司力士
內使以阮鏗爲飛武司都飛武力士內使直端康宮如都力士直金光
殿着銀帽金鳳翅有紅毛尾以阮公論爲飛武司飛武力士內使着水
銀帽有紅毛○設宮門承制監如司禮監御象御馬二司○設御象監

御馬監御象帶刀內使着水銀帽畫金葵花御馬着水銀帽紅葵花御
馬御象二監鬪力持杖相擊自清陽門至太廟門外帝以爲樂以錢帛
賞之○帝自卽位之後每夜與宮人酣酒無量醉卽殺之時權歸外戚
東則華陵發鄉父西則仁睦帝鄉妃北則扶軫帝鄉母皆擅怙權勢沉溺臣僚
有以私意而屠戮生民有以密體而誅求錢貨凡民間六畜生花等物
一切掠取及民家有奇財奇貨標字取之萬民嗟怨而帝弗悛又心懷
猜忌凡前日臣下之不立己者往往誅之又密使內人阮廷科往體察
諸叔父兄弟凡二十六王而荆王以叔父逃遁不知所之獨簡脩公以
叔伯之子繫獄得脫由是人人自危益思作亂○命都督保祿伯黎子
雲武耿等往經理廣南地方先是洪德元年聖宗親征占城得茶遂妻
子歸于本國置居寶慶門外幾三十年至景統年間子茶福盜其父茶

遂骸骨。逃歸其國。留一親娣。於兵燹野火上聲也。時始亾。至是諸勢家功臣占奴。居田庄。亦逃回國。武耿驛奏。言作亂者占人。帝令殺占人殆盡。不知作亂者。占人制設等。後得漂海。占人麻末等。監在承制。再供。謂前年茶福已回彼國。使男罵羅。往明國求援。又作船糧數多。故命耿等。往經理。○以楊直源爲御史臺都御史。○秋八月。詔捕占人拘執者。盡殺之。○九月。吏科都給事中楊德簡奏言。臣等奉查洪德七年間勅旨。國子監生三舍生。年三十以上。本官方得保選除用。八年間勅旨。崇文館秀林局儒生。本官保結考試。年深才幹。并會試中場。並得除用。臣竊見監生。儒生。年未至三十。充未滿十五年。但以會試中場。往往僥倖求進。有所攪擾不便。伏乞。繼今。監生。儒生。年已至三十以上。充已滿十五年以上。本官方得保選除用如例。敢有徇私保舉。少年淺者。該科御史臺

舉奏治罪。以懲人臣徇私妄保。及僥倖攪擾之弊。寧郡公黎廣度等奏云。臣等竊見楊德簡所言。誠有理。然中間猶有未備。今臣等再奉議各條。一條奉議。國子監監生。會試累遭中場。十五年以上。年深場多者。方得充上舍生。引選銓除牧民首領伴讀長史訓導等職。若累中場已滿十五年。未得充舍生。及一遭中場。已滿十八年以上者。亦許保選。除閭門序班伴讀長史講諭等職。一條奉議。官員子孫。充崇文館秀林局儒生。會試中場。年深場多。滿十五年以上者。并單中一場。滿十八年以上者。方得保選。除牧民首領等職。若年深才幹無中場。滿二十五年以上者。亦許保結考試。除州縣貳職。其已經引選。而未滿年限者。待滿年限。方得除用。若皇后親屬苗裔。并開國功臣子孫。充崇文館儒生。遵如前例。○冬十月初一日。有彗星。白色。見于西方。十日始滅。○十一月。有白

氣如劍。出于東南。長丈餘。○帝斥逐皇宗功臣。回清華地方。并殺女史內臣占人。時外戚姜种、阮伯勝等。擅作威福。權傾中外。民間不得舉手動足。禁法門之呪咀。道士奉道剪髮。不得長髮。以故庸舍市肆奉先師者。皆藏之。後承教承業。行路官員。百姓見於一里。皆竄走。入庸舍市肆家。去後始出。阮廷科密使人往天下各處。承憲府縣。至於民間。脅娶處女。荼毒蒼生。天下失望。○是時。長樂皇太后之親阮文郎。亦在逐中。回本貫。大臣宗室宜郡公黎能謹。不得志。有詩寄與阮文郎。使舉兵誅惡黨。文郎通韜畧。精兵法。善觀天時。力能捕虎。於是文郎率占奴制謾、武伯、武接。并清華三府人。舉義師于西都城。以軍鎮神符海口。○時。帝戕害宗室。簡脩公濬。猶被繫獄。乃以財物賂守者得脫。未及告母并兄弟與其妃。乃挺身逃入西都。至神符海口。見文郎。奉迎立爲盟主。因與文

郎。造長鎗。及大臣阮演、吳禎、阮伯高、黎港。與清華總兵僉事阮伯俊。承宣使黎嵩。參政阮時雍等。同起兵。使梁得朋爲檄。諭大臣百官。其畧云。暴主黎濬。猥以庶孽。濫玷洪圖。因循殆至五年。盈串已成萬狀。傷殘骨肉。沉溺臣僚。寵戚畹。而狗尾縱橫。遠骨鯁。而魚頭竄伏。爵已盡。而濫賞不盡。民已窮。而濫取無窮。征賦若錙銖。用財若泥沙。暴虐殆同於秦政。待臣如犬馬。視民如草芥。慢侮有甚於魏甞。况又大其宮室。廣其苑囿。驅民種樹。宋花綱之覆轍相尋。填海築宮。秦阿房之昏風復踵。土木築而改。改而築。疲勞海陽京北之民。華宗驕而橫。橫而驕。騷擾藩鎮四宣之境。居民疾首。率土痛心。又檄云。端慶御圖。外家擅政。子模以市井昏愚之輩。紊亂朝綱。伯勝种以閭閻乳臭之童。妄行威福。甚至鳩殺祖母。魚肉親王。以私意而屠戮生民。罔知紀極。以密體而誅求錢貨。益肆貪

淫。四海困窮。萬民愁怨。○簡脩公濬。詐稱爲錦江王。豎錦江王招安旗。○是月初八日。簡脩公濬。自西都。發水步諸營並進。水軍到天健山。帝以河清、海清二輕船。馳到天健山葆寺。獲其水營將一人。并得兵卒二十馘。將回東華門外。帝命副將東巖伯黎瑀。贊理御史臺都御史楊直源。記錄右侍郎范盛、陳能等。提領禁軍并神武。効力殿前諸衛官軍禦之。弗克。二十三日。濬兄錦江王濬并弟靖亮公濬及涓。與壽梅駙馬阮敬。皆遇害。濬軍猶以錦江王招安旗。撫諭使瑀等來降。瑀以錦江王頭示之曰。此錦江王之頭也。何以詐爲。瑀騎象壓兵。進戰同樂處。陣陷。不屈而死。楊直源、范盛、陳能等。亦歿於朱橋。官軍敗還。二十六日。濬軍諸營並進。至寶陀、仁睦、紅梅、燒身等處。帝出青陽門。慰勞金光殿力士及錦衣金吾將士。以銀賜程志森、黎廣度等。發金銀錢財。賜五刑見監囚。

人。每人三鎚。使以擊賊。受畢。各歸其家。又倉卒徵兵。帝命中使華文學生。每司各二員。人齎捧勅符。往諒山、太原、宣光、安邦各都司。詳勅合符。調取各鎮土兵。每鎮五千人。以防擊賊。其人受勅符去。帝許御前朱漆短稍。每人一柄。以隨身。未到菩提春耕等處。濬軍已入逼城。殺皆遁去。皇后陳氏松迯出。至紅梅社。匿于民家。自縊於寺廟。黎廣度與簡脩公。內外相應。傳砲爲信。揭竿爲旗。斬木作兵。自相攻擊。以駭衆軍。因劫帝北幸。簡脩公至東京城。聞父建王與兄錦江王、弟靖亮公、季弟涓等遇害。命官治喪事。與行葬禮。二十八日。帝走至日昭坊前。衛士追獲之。納與簡脩公。繫麗景門。公以衛士不義。遂殺之。十二月初一日。帝飲鴆自盡。簡脩公以帝前日殺父母兄弟之慘。憤猶未解。使人以大砲。置屍火處。砲發。散盡骸骨。止以餘燼。回葬母鄉扶軫安陵。降爲愍厲公。一說。義師逼近。

帝出幸安朗縣東學社及悔村。被本社市肆人迎。回納于阮文郎將回北使館。弑之。其外戚亦皆盡殺。

按洪順治平寶範曰。端慶年間。內朝干政。外戚專權。法令煩苛。紀綱紊亂。農桑失業。風俗日偷。甚可憫也。况又傷殘骨肉。沈溺臣僚。所為若是。欲不亾得乎。

按阮煜洪順中興記曰。愍厲失德。种伯勝專權。承業以牧牛之豎。兼掌宗人。子模以賣魚之兒。總領宿衛。登進豺狼之輩。競開賄賂之門。修第宅。則太原宣光等處山無木以塞欲源。索鹹鹽。則父安安邦地方海無鱗以填餓喙。太阿倒置。神器展搖。災異屢見。下民怨嗟。其亾宜矣。○論曰。愍厲信任外戚。暴虐無道。誅戮宗室。殘酷百姓。自取滅亾。不亦宜乎。

○是月初四日。簡脩公即皇帝位。大赦改元。以是年為洪順元年。○以

杜綱為東閣學士。陞朝列大夫。以綱曾奉北使。故授此職。○帝既即位。命頭目黎廣度、黎瑠、阮文郎、黎嵩、劉興孝、程志森、鄭綏、梁得朋、杜履謙、丁勳、鄧鳴謙、杜綱、黎彞、譚慎簡等。上表陳情于明。其辭云。端慶黎濬。襲封王爵。經四年間。寵任母黨。姜种、阮伯勝等。恣行凶暴。濁亂朝綱。屠戮宗親。鳩殺祖母。荼毒國人。民不堪命。种、伯勝等。權傾中外。惡黨日滋。圖竊國柄。○十七日。追尊母鄭氏。為徽慈莊惠建皇太后。命殿前都檢點瑞陽侯鄭侑。為山陵使。戶部尚書鄭維岱。副之。延郡公駙馬都尉黎茂昭。為總護使。清華總兵僉事阮伯佺。副之。譚慎微等。副之。以本月十九日。遷葬于御天之美舍鄉。二十九日乙丑。立徽慈莊惠建皇太后碑。命禮部左侍郎翰林院侍讀掌翰林院事梁得朋。撰記。○追諡顯祖。宣祖。太祖。皇帝。皇太后。以下尊號。尊父建王。曰配天裕聖溫良光明文哲。

寬弘彰信綏休睦孝建皇帝。母建皇太后鄭氏。曰徽慈莊惠嘉亮柔聖和穆信謙明正懿淳福慶皇太后。贈同母兄錦江王滌為莊定大王。次弟靖亮公滌為穆懿王。季弟涓為翼恭王。滌音雍。崇音雍。○以吳煥為清華贊治承宣使司承宣使。尋授吏部尚書。

大越史記本紀實錄卷之五終

大越史記本紀實錄卷之六

黎紀六

襄翼帝

諱滌。又諱喞。聖宗之孫。建王鑽之第二子也。在位八年。教

愼罰。亦足以有為也。然優游不實。由於此。其母徽慈建皇太后鄭氏。諱瑄。乃雷陽水注人。都督僉事兼左

宗正仲峯之第四女也。以洪德二十六年六月二十五日生。憲

宗時封簡脩公。及威穆帝誅戮宗室。乃挺身入西都。以端慶五

年十月。舉兵至東京。遂殺威穆帝而自立。以生日為天保聖節。

稱仁海洞主。及遇害。鄭惟慳降封為靈隱王。後追尊襄翼帝。

庚午。洪順二年。明正德五年。春正月。論應義師功。以義郡公阮文郎為義國

公。加紹郡公黎廣度為紹國公。諒郡公黎輔。為諒國公。威郡公黎伯璘

爲威國公。戶部尚書鄭維岱爲文郡公。殿前都檢點瑞陽侯鄭侑爲壽郡公。駙馬都尉黎茂昭爲延郡公。文郎子阮弘裕爲安和侯。鄭惟慳爲美惠侯。清華總兵僉事阮伯俊改伯俊爲禮部尚書。由禮部尚書由禮部。清華承宣使黎嵩爲吏部尚書。敦書伯。清華參政阮時雍爲御史臺都御史。良文伯。譚慎徽爲刑部尚書。翰林院侍讀參掌翰林院事。梁得朋爲吏部左侍郎。○議置提領官。有掌提領、同提領、副提領、提領、四城軍務事。其職掌則巡警京師。各處斥埃。擒捕姦非。○二月。遣使如明。刑部尚書譚慎徽。東閣校書阮文泰。兵科都給事中黎承休。通事阮鋒。行人三名。從人八名。奏事。禮部左侍郎阮綱。侍書武幹。提刑阮允文。通事阮好。行人三名。從人九名。求封。時承休往至界首。有疾。乃遣兵科都給事中阮文俊代行。○帝稱仁海洞主。○二十七日。以東閣學士杜綱爲戶部左侍郎。綱

改名岳。避御稱仁海也。○太祖廟承慶。○夏四月二十五日。夜二更。內豎阮克諧作亂。逼帝幸重華宮。又幸萬壽、謹德、敬天等殿。帝作國語詩。大臣文武入侍奉和。惟東閣校書陳翼和合格。賜錢五貫。夜時有內臣阮領。迎帝幸蓮池。逆徒出外。以乘輿迎花溪王從爲僞主。帝命壽郡公鄭侑等討之。追至東河。逆徒就戮者過半。其餘黨渡河過善提。遁去二島。冊。侑差裨將追討之。○二十六日。大赦。○詔置天武、聖威二衛。在錦衣、金吾之上。其制帽樣用朱帽。有金紅鳳翅。○哀牢局蒙遣使。到父安遞本驛。奏乞納款歸附。詔却之。以新得國。恐其窺竊國中故也。○六月。以生日爲天保聖節。○秋八月。太白經天。○改號令力士。爲體察力士。○九月初七日。聖旨。凡給賜田土桑洲潭池等項。准各處宜給入。其留脫猶在民。未入官簿籍。許太僕官自能尋覓。具本奏聞。送下戶部并

本處承司。許該勘具本取旨。轉送禮部奉行。勅給公侯伯。各有差。○冬十月。以戶部左侍郎杜岳爲東閣大學士。入侍經筵。起復吏部左侍郎梁得朋。兼東閣學士。入侍經筵。固辭不受。得朋因獻治平十四策。其畧曰。臣聞古之聖君。不以天下旣治。而忽警戒之念。古之賢臣。不以其君旣聖。而忘箴規之心。是以虞舜之時。旣熙皞矣。而伯益之矢謨。則曰。罔遊于逸。罔淫于樂。無怠無荒。慄慄乎如危。亾之將至。帝舜納其言。而戒其所當戒。此所以爲大聖也。漢文之時。旣富庶矣。而賈誼之獻策。必曰。厝火積薪。可爲流涕。可爲痛哭。惴惴乎若禍亂之已形。文帝納其言。而憂其所當憂。此所以爲賢君也。蓋以臣之進言。不諄勤。不激切。則無以助人君納諫之明。君之聽言。不采納。不寬容。則無以開人臣進諫之路。今陛下寬仁大度。不嗜殺人。復高祖之業。救萬民之命。四海之內。如解

倒懸。莫不延頸企踵。仰望新政之成。鼓舞太平之治。然而卽位以來。和氣未調。干戈未戢。朝綱未舉。軍政未修。災異屢見。恐天道之未順。山石剝削。恐地道之未寧。奸宄竊發。逆賊潛萌。恐人道之未安也。而在朝之臣。知而不言。其自計得矣。如國計何。臣忝以舊臣。義同休戚。雖在衰經之中。通喪未畢。而陛下以義奪情。置之侍從。蓋欲臣有所議論。猷爲裨益天下。輔贊太平矣。如臣不言。旅進旅退。碌碌隨人。苟容竊祿。則臣之忠孝兩虧。何以報陛下之恩。盡人臣之職。每念時事。則終夜不寢。臨食不發。犬馬之心。自不能已。謹條治平十四策以聞。一日。致警戒。以弭災異之變。二日。篤思孝。以敦忠厚之心。三日。遠聲色。以正一心之本。四日。去邪佞。以清萬化之源。五日。惜官爵。以謹勸懲之典。六日。公銓選。以清仕進之途。七日。節財用。以敦儉樸之風。八日。褒節義。以重綱常之道。九

日。禁賄賂。以革貪墨之風。十日。修武備。以壯金湯之勢。十一日。擇臺諫。以作敢言之氣。十二日。寬力役。以孚俟望之情。十三日。信號令。以一四方之志。十四日。謹法度。以開太平之治。以上等策。上下睿覽。臣又聞古語云。勸善之言。聖人擇焉。書曰。知之非艱。行之惟艱。臣願陛下勿以臣言爲迂闊。擇而行之。戒其所當戒。憂其所當憂。庶乎天道可順。地道可寧。人道可安。太平可致也。上從之。○加紹國公黎廣度平章軍國重事。總統國政太宰太師。○還常川舍人。初景統年間。停常川司舍人。至是。掌衛明倫侯黎念具本請還。從之。○作天光殿。○定賞蕉園、寶陀及鎮守皇城店功。詔山南各處員人。於蕉園處、安寧、安謨、奉化、嘉遠等縣。預從義師。并從諸營。有官賞五資。無官者饒軍色。倣如前聽撥例。輪番習藝。宿直。再有暫留宿直。功與宿直同。有官陞一級。無官者除正九品。有

宿直。選入護衛。而從義師者。除從九品。衛士俊士功臣子孫儒生監生文屬等項。勤幹壯健者。除護衛。勤幹不壯健者。除外任。各職軍色。民人有軍功。並許本職隨次除用。子孫並得承蔭。各處員人有能就西都城從駕有功者。與清華員人軍功賞同。若清潭、今改清池上福、清威、慈廉等縣員人。鎮守并輪番。守皇城外店。有官者陞一級。無官者饒軍色。各項倣如前聽撥例。輪二十番。守皇城外店習藝。若有輪番宿直。無鎮守。賞五資。輪二十番。守皇城外店儒生生徒。賞五資。○十一月。帝遣御史臺副都御史杜履謙。翰林院侍讀兼史官阮秉和。超類永世人。初名文獻。提刑監察御史阮德光。通事阮明。行人八名。從人二十五名。如明歲貢。○置直金光殿漆寶刀司。以費萬全。永賴春池人。爲御史臺副都御史。范謙柄爲僉都御史。加良文伯阮時雍奉直大夫尙書御史臺都御史。杜岳奉直大夫尙

書東閣大學士入侍經筵。由禮伯阮伯佺奉直大夫禮部部書。程志森奉直大夫工部尚書。武瓊朝列大夫兵部尚書。范暉嘉行大夫戶部左侍郎。鄧鳴謙朝列大夫吏部左侍郎。黎挺之爲戶部右侍郎。

辛未。三年。明正德六年。春正月朔。日有食之。○二月。帝謁藍京。時申維岳、武

人。大璉吳文綜起兵于京北。安富、東岸、嘉林等縣地方。有安富儒生朱植。

告于東京留守瑞郡公吳柄、金源伯鄭伯适。遣兵擊破之。擒維岳、文綜

等。檻送京師。傳詣行在。初維岳於端慶年間。舉進士出身。官至錦衣衛

斷事。直金光殿。至帝起義師。弑愍厲公。維岳遂回家不仕。稱兵作亂。至

是誅之。後賞朱植功。除奉天府尹。帝發金山。并六宮妃嬪。幸金甌寺。晚

駐飛來寺。觀競舟。幸顯仁殿。又幸盛美殿御營。駐于翠靄。遇暴風大作。

御舟並漂蕩。○三月。會試天下士人。取阮泰華等四十七名。泰華、青林、大育、人、廷

士試同進。及廷試。上親策問。以古今治道。命提調太宰太師紹國公黎廣

度。知貢舉。工部尚書程志森。監試。戶部左侍郎范暉。吏部左侍郎鄧鳴

謙。讀試卷。禮部尚書阮伯佺。尚書御史臺都御史阮時雍。尚書東閣大

學士入侍經筵。杜岳及奉卷進讀。上親覽定其高下。賜第一甲黃義富、

陳保信、武維周三名進士及第。第二甲裴允協等九名進士出身。第三

甲陳允明等三十五名同進士出身。○夏四月。命都督同知黎豐爲都

將。范德贊爲參將。阮篤爲總督。往廣南、順化地方。捕公象。○以黎公澄

爲海陽參政。范謙爲海陽憲察使。○兵部尚書國子監司業兼史官都

總裁武瓊。唐安縣進大越通鑑通考。述自鴻厯氏。至十二使君以前。爲

外紀。自丁先皇。至本朝太祖高皇帝大定初年。爲本紀。并詳節歷代紀

年。凡二十六卷。○進封天武衛都指揮使莫登庸。爲武川伯。時豪傑并

術士皆云。東方有天子氣。帝使義國公阮文郎。以術士往塗山厭之。登庸亦在此行。終不之覺。○二十七日。頒治平寶範于天下。凡五十條。諭文武官員百姓等。惟天惠民。必立之君師。惟辟奉天。必先之教養。所以和民心。阜民財。致國家長治久安之效也。昔堯舜底時。雍熙皞之休。本乎五典之惇。九叙之歌。湯武臻嘉靖泰和之治。本於五教之敷。八政之用。是聖帝明王。代天理物。曷嘗外教養以爲治哉。太祖高皇帝創業垂統。立學勸農。以寵綏乎四方。太宗文皇帝繼志述事。敦化厚民。以和寧乎萬國。聖宗淳皇帝祇紹先猷。盡倫盡制。頒大誥。以敦風化之原。憲宗睿皇帝克篤前烈。迪哲迪康。作敷言。以厲興平之俗。重熙累洽。德博化敦。治效之隆。於斯爲盛。比至端慶年間。內朝干政。外戚專權。法禁煩苛。紀綱紊亂。農桑失業。風俗日偷。甚可憫也。朕念祖宗締造之艱難。軫兆

姓閭閻之疾苦。爲宗社生民計。大舉義兵。永清四海。卽位之始。敷教慎罰。以防範民心。發政施仁。以迓續天命。惟欲典章制度。煥然一新。乃取其有關政治風俗者。輯爲治平寶範。以頒行天下。惟爾臣庶。咸體朕心。是訓是行。同歸于治。以享萬世太平之福。以綿億年永遠之圖。所有訓條。開列于左。一。人臣事君。宜咸懷忠良。恪居官職。國爾忘家。公爾忘私。同寅協恭。直言極諫。不可阿諛取容。竊祿倖位。私受干謁。賣爵鬻獄。以致妨害治道。違者治以重罪。一。皇宗功臣。掖庭勢家。與國同休戚。當體朝廷愛養生民之意。其給賜田土。陂池。桑洲。□□□□候勘給定界碣。方得耕作。若未經勘實。□定界碣。不可奪穫禾穀。并容受奸人出入。妄抑民間田土。濫取過多。致小民失業。并宜教訓子孫。戒飭奴婢。使曉知禮法。不可恃勢驕驚。毆打細民。走馬街衢。踐傷人命。及遏截道路等處。

奪取民財。違者許被害及見知人。投告科臺憲司府縣州官。具奏送刑部治罪。若科臺憲司府縣州官。畏避權勢。不肯爲理。許本人詣闕奏聞。科臺憲司等一體治罪。一。內外各衙門等官。宜正身率屬。恪勤厥職。在公。不可徇欲恣情。耽迷酒色。妄使所屬。媒引妓妾。要索酒殺。流連酣飲。以致怠棄公務。敗傷風化。違者如律治罪。一。吏部宜恪守公平。銓衡人物。慎惜名器。澄清仕途。如引選。則每遭四十人。吏部先移咨各衙門。端供應銓除者姓名。公同科臺引選。具奏取旨銓除。年深及場多者先銓除。年淺及場少者後銓除。有軍功者。則遵如洪德賞功令銓除。疾劣瘦弱者。除雜流散官。敢有賄賂徇私。銓選失序。許都臺檢奏。如律罪之。都臺不能檢奏。一體治罪。一。監生儒生生徒。每至朔望。各具衣巾。黠目如法。遵守學規。習肄課業。期於成材。以資國用。敢有僥倖奔競。遊戲道途。

廢弛學業。一遭欠點。罰中紙一百四十張。二遭欠點。罰中紙二百張。三遭欠點。罰四十。下四遭欠點者。檢奏刑部勘問。一年欠者舉奏充軍。一。鄉試提調、監試、監考、考試、巡綽等官。及社長。宜體朝廷德意。務秉公心。期得實材。爲國家用。社長修簿。供結士人。要得實學。不限人數多少。送本縣州官。考暗寫一場。府官考經義三道。承憲官公同考試。如例。事畢。卽日類取中三場千人。中四場千人。作簿。公同差考試官署字。以防奸詐。期三箇日。提調、監試等官。具本奏聞。停憲司審覈。敢有徇私規財。市恩挾怨。聽從權勢。貢舉非人。及具本遲緩者。許科臺舉奏治罪。一。端慶時。多有奸人出入。扶軫華陵惡黨之家。或假稱親人。或求買帖子。侵占民田土。奪取民財貨。毆打良民。挑謔婦女。亦有停止。奸人分財入己。恃勢凌轍。爲害愈滋。今惡黨雖已伏辜。而前項奸人。猶扭故態。肆行凶惡。

攪擾細民者。聽被害人。並坊社村長。押引正身。投告承憲府縣州官具本。如律治罪。若承憲府縣州官畏避不肯爲理。許被害人詣闕奏聞。一體送刑部治罪。○五月初五日。上御散天殿。鴻臚傳唱進士黃義富等名。百官朝服慶賀。奉頌恩命。禮部捧黃榜。揭張于大學門外。仍賜以衣服冠帶并宴筵。○加諒國公黎輔左平章軍國重事。入內檢校。上相太尉。義國公阮文郎開府儀同三司。平章軍國重事。輔國丞相。上宰太傅。威國公阮伯麟工部尙書。掌部事。知顯福殿。譚慎微吏部尙書。知昭文館。秀林局。黎贊襄工部右侍郎。○冬十一月十一日。不拔縣光被入陳珣作亂於山西地六。珣乃前吏部尙書陳璠之孫。是時京城庸舍。人民騷動。俱將妻子回于本貫。街衢道路絕無人行。帝命戶部右侍郎黎挺之。同科臺等官。勘庸吏市肆。某人猶在本家。某人妻子已回本貫。令加禁止。法重嚴

謹。難於舉動手足。或某妻子已回家。多以他人詐爲妻子。以候差官驗實。至是。命舍人往大臣家。文臣家。觀其虛實。見黎挺之。阮宗鷲。阮履光。並翰林檢討吳綬。監察御史陳頊等五人妻子。並回本貫。帝命殺挺之。等于東河坊三岐路。以挺之等爲檢勘官。而妻子先已逃回故罪之。○帝命美惠侯鄭惟慥。提領官軍。往擊陳珣。時珣兵逼犯于慈廉。縣名。屬國威府。官軍敗績。退還駐于東鄂。日昭等處。珣兵勢甚盛。欲逼京城。義國公阮文郎。令殿前六衛軍。拽小天光舟下水。欲幸清華以據險。仍湊調工部各所匠常班匠人。列奇於東河處爲守。夜驚怖逃回。帝命明倫伯黎念。總太監黎文耀及華文學生二人。以海清。河清二司力士。把棹二輕舟。往慈廉地方。偵訪賊情。念先到安嘉市。見庸舍燒盡。官軍已敗。退回渡河。入寡悔社。念再馳回。入殿前面奏。是時惟慥爲賊所敗。手下僅存三

十餘人。裂衣爲標。誓與擊賊。酉時惟慥猝至。突入珣營中。見珣着紅袍坐床上。以鎗刺殺之。其徒黨皆走散。時屯聚在別處者。不知逆珣已死。屯聚如故。二十日。帝奏告太廟。仍命阮文郎將諸營將士馬象討之。時惟慥已殺陳珣。因乘勢發砲三響。諸軍鼓噪進戰。大破之。追至瑞香果洞。東鄂等社。刺殺甚多。僵屍滿野。沈溺江中。不可勝紀。後定功以惟慥爲源郡公。其從惟慥。刺殺數多。皆授以都指揮同知。軍功有刺殺數多。授職自此始。○斬胡把於延興坊。先是都力士胡把擊賊却回。折金鳳翅藏之。及賊平斬之。○殺戶部司務李文思。先是陳珣之亂。京城諸王公主。庸舍市肆民間。皆走出大羅城外。寓於紅梅。盛烈等社地方。文思亦避去。私說輕侮大臣。阮文郎。鄭維岱等面奏聞。故殺之。○賞大學士杜岳等十一人。初陳珣逼近京城。人心驚怖。惟岳等應務朝堂。上命類

大臣文臣。止有十一員。奉勅旨。議賞。以表其忠。○分金銀稅例。天下金稅例。十成色。兼金四百四十九兩五分六釐四毫。原例四百六十兩。代納公象二十兩。十成色金二千九百一兩六錢九分五釐一絲。原例二千八百六十三兩。若銀稅例。十成色。花銀六千一百二十五兩九錢八分四釐八毫。原例四千九百三十兩。○命阮文郎重修國子監崇儒殿。及兩廡明倫六堂。廚房庫房。并新構東西碑室。左右每間置一碑。是歲立端慶元年乙丑科。四年戊辰科進士題名二碑。時上旣命重修國子監。并新構作碑室。又慮端慶二科未有立碑。乃命冬官刻石。尙書東閣大學士入侍經筵杜岳撰記。中書監舍人杜如之書。知尙寶監裴時篆。按杜岳記云。帝聰明作后。睿知表邦。恢太祖立極之圖。弘聖宗觀文之治。初設講筵。留心典籍。煥經天緯地之宸奎。則有寶天清暇集。廣

酌古準今之治鑑。則有光天清暇集。聖學益以高明。聖德益以純粹。尤且幸學訪道。臨軒策士。其鼓舞之機。於是尤至。既命官重修國子監。及新構碑室。又慮乙丑戊辰二科。未有立碑。乃命官刻碑撰記以立之。此可見敦崇褒獎之至意也歟。

壬申四年。明正德七年春正月。命武將統領兵叅杜岳。贊理軍務。往山西。興化地方。討平逆阮嚴等。○三月初三日。聖旨係開國功臣子孫。猶屈在軍伍。許將祖父勅命褒美文。投告該處勘實。識字者充崇文館學生。不識字者充錦衣衛俊士。○加黎嵩少保禮部尙書。東閣大學士。兼國子監祭酒。知經筵事。敦書伯。○夏四月。考試官員子孫書算。中者充儒生。并各衙門吏。○黎熙一作鄭興、黎明徹等。作亂於乂安地方。帝命康郡公陳儀。東閣校書陳翼等。往討之。入乂安地方。儀等腹背受敵。官軍渡

海。被風波破打。全軍溺死。儀、翼亦沉于海。熙、興等進逼雷陽。五月既望。帝命鄭惟懌。提領官軍。杜岳贊理軍務。往清華、乂安。討平之。斬黎明徹。傳首詣京師。懸於東津坊。生擒熙、興。檻送京師。誅之。○放湊調四政民兵。回田里。時倉卒聞鄭興等竊發。逼犯清華。時日已暮。門上已鎖。有旨與朝堂等官。議仍勅諭於大興門外。令差大臣湊調四政民兵。就地各處分隸兵籍。以防討賊。至是。賊徒就戮。令放回田里。○置左金刀、右寶刀。○旱。天下大飢。○作大殿百餘屋。初錦江縣明決社匠人武如蘇。即名。於家以蔗構成百屋。脊大殿。至是。以此圖進。勸帝構作之。○冬十月。贈楊直源爲御史臺都御史。

癸酉五年。明正德八年春正月。義國公阮文郎卒。贈義勳王。葬祭用王者禮。鑄金爲像。○二十六日。明遣正使翰林院編修湛若水。副使刑科右給

事。中潘希曾來。冊封帝爲安南國王。并賜皮瓣一副。常服一套。希曾見帝。謂若水曰。安南國王貌美而身傾。性好滌。乃猪王也。亂亾不久矣。及還。帝厚贖之。若水希曾不受。帝餞若水詩云。鳳詔祇承出九重。皇華到處總春風。恩覃越甸山川外。人仰堯天日月中。文軌車書歸混一。威儀禮樂藹昭融。使星耿耿光輝遍。預喜三台瑞色同。若水次韻答云。山城水郭度重重。初誦新詩見國風。南服莫言分土遠。北辰長在普中天。春風浩蕩花同舞。化日昭回海共融。記得傳宣天語意。永期中外太平同。帝餞希曾詩云。一自紅雲赭案前。使星光彩照南天。禮規義矩周旋際。和氣春風笑語邊。恩詔普施新雨露。炎封永奠舊山川。情知遠大摠賢業。勉輔皇家億萬年。希曾次韻答云。皇家聲教古無前。此日春風動海天。龍節遠輝南斗外。烏星長拱北辰邊。維垣義在思分土。納誨才踈愧

濟川。臨別何須分重幣。贈言深意憶他年。帝又餞若水詩云。聖朝治化正文明。內相祇承使節行。盛禮雍容昭度數。至仁廣蕩煥恩榮。留時欲叙慇懃意。餞日難勝繾綣情。此後鑿坡承顧問。南邦民物固昇平。若水次韻答云。良富從頭春日明。我歌聽罷我將行。自天三錫元殊數。薄物諸邦孰與榮。更謹職方酬聖德。每將人鑑察群情。臨岐不用重分付。萬里明威道蕩平。帝又贈希曾詩云。乾坤清泰屬三春。使節光臨喜色新。炳煥十行頒漢詔。汪洋四海溢堯仁。胷中冰玉塵無點。筆下珠璣句有神。今日星輶回北闕。餞筵盃酒莫辭頻。希曾次韻答云。萬里觀風百越春。瘴煙消盡物華新。車書不異成周制。飛躍元同大造仁。稍似滄溟滌海蜡。永懷朱鳥奠炎神。畏天事大無窮意。纔入新詩寄語頻。○加段懋爲戶部尙書。知照文館秀林局。謹禮男。○二月二十七日。帝遣禮部右

侍郎阮莊。翰林院檢討阮瑯。傳也。師禮科給事中張孚說。如明謝冊封。并謝賜冠服。○二十八日。明使於北使館。求善書人。使寫白牌。送回本國。憑祥州整飭兵夫。候明使回還。○是日帝御光治殿。觀象圖虎。○以前金光門待詔阮惠。爲禮部左侍郎。行金光門待詔。知尙寶監各局。帝初得國時。失國寶。無以合明國符契。有金光門待詔阮惠。能作國寶。命刻之。以合于明。果與所賜之寶同。至是。明遣若水等來封。而惠以老回家。帝念其功。復召用之。○機舍江有蛇。見二十日。○三月。帝親臨祈嗣於祥光殿。○加杜岳光業大夫。尙書東閣大學士。入侍經筵。○帝於奉先殿前。作穆清殿。東西夾室。以梁王銓。宋王錠以下附薦。先是。奉先殿以太祖高皇帝居中。宣祖皇帝居左。顯祖皇帝居右。太宗。聖宗。肅宗居宣祖左之東。仁宗。憲宗。德宗居顯祖右之西。孝敬堂。以昭孝大王。郡哀

王居東。忠勇王居西。至是。作穆清殿。堂東夾室曰彰德堂。以昭孝大王。郡哀王。梁王。唐王。演王。名鑄應王。名肇王。名銳附之。西夾室曰昭勳堂。以忠勇王。名石恭王。宋王。福王。名錄廣王。名鏞鎮王。名經義王。名鏞荆王。親附之。○夏六月初七日。洪水。決安華坊堤。通西湖。○以翰林院檢討阮茂。爲清華憲察使。帝嘗使人採取木綿花。茂上疏諫忤旨。帝差中使。拿笞之。○秋八月三十日。勅旨錦衣衛俊士。已被充軍。再開却還前貫如例。○立洪順三年辛未科進士題名碑。命工部尙書掌部事。知顯福殿。威郡公阮伯麟。督理題名碑事。少保。禮部尙書。東閣大學士。兼國子監祭酒。知經筵事。敦書伯黎嵩。撰記。中書監舍人吳寧。書。知尙寶監各局阮惠。篆。○冬十月十三日。遣兵部右侍郎阮仲達。翰林院侍書許三省。提刑監察御史阮貴雅。如明歲貢。封延郡公黎義昭爲太傅。雄國公。加阮侶爲戶部

尙書瓊巖侯。○十二月初三日。太傅壽郡公鄭侑等。奉勅旨。順天年間。功臣有美文勅命。并皇宗總麻前已承蔭。充錦衣衛俊士。仍留本衛。未充者。繼如前例。或往年被送充各衛。今再還俊士如前。所以表功臣之勸。昭親親之風。

甲戌。六年。明正德九年。春二月初九日。帝謁西京。○耕籍田。未折。○三月。會試天下士人。時應試者五千七百人。取阮秉德。秉德前名界。後改寧邦。廣德縣盛光坊人。廷試同進士出身。莫朝仕。至尙書少師廉郡公。等。共四十三名。○夏四月二十七日。帝親御殿試策。問以人才。命左平章軍國重事。入內檢校。上相大尉。諒國公黎輔。吏部尙書。知昭文館秀林局譚慎徽。工部右侍郎黎贊襄。少保。禮部尙書。由禮伯阮伯佳。戶部尙書。知昭文館秀林局。謹禮男段懋。少保。禮部尙書。東閣大學士。兼國子監祭酒。知經筵事。敦書伯黎嵩。戶部尙書。

東閣大學士。入侍經筵。杜岳。分董其事。賜阮德亮。阮昭訓。黃明佐三名。第一甲進士及第。阮瑀等二十名。第二甲進士出身。阮秉彛等二十名。第三甲同進士出身。○五月。詔進士阮德亮等。入天光殿。應制命。作天光殿記。○是歲有金星。晝見。○大洪水。城中湖池有大蛇入。見二十日。上以砲旗鼓制之。四月後出。○造作城包蘇瀝江。爲祥光殿。○帝聽校尉有永。姓缺誣奏。遂殺宗室凡十五。王公殆盡。召愍厲宮人。及前朝宮人。通蒸之。○秋九月。命少保禮部尙書。兼東閣大學士。兼國子監祭酒。知經筵事。敦書伯黎嵩。撰大越通鑑總論。諡前名邦。本清廉安樂人。○冬十月十七日。吏科都給事中范智囊奏。一。繼今。除用官職。吏部遵如洪德年間例。擇某員任職。年深滿考。有功績。民心所服者。方得銓除。如吏部銓除非人。刑部依律治罪。○十二月初四日。禮部尙書。掌部事。駙馬都尉。興郡公。

阮貞等。奏定充福國長公主君習畫字禮冊。并籍冊及墨一校合無御用監制作冊。并照發禮添陳設七十士各位禮物。用卓子八十件。黑線香十八把。蠟炬二十株。茶三兩。油一斤。草芒一兩。鹿脯。鹿脯。用方紙如冊。篋。青。豈。組。各十八。蓮酒二壘。柴三十一。束。至日行禮。籍用方紙如冊。篋。○以陳崇穎爲戶部尙書。

乙亥。七年。明正德十年。春正月。命瑞郡公吳柄、源郡公鄭惟慳等爲都將御史臺僉都御史。范謙柄贊理軍務。討馮章於三島山間。章敗走。○二月。帝親觀習陣于定功。再回幸皇妃黎氏家。○韶溪伯吳恕作亂。伏誅。○是歲搜各鎮納木船。以征哀牢。○時有麥。生粟二升。○以工部右侍郎黎贊襄。權吏部右侍郎。○秋八月九日。大水。○冬十月初七日。安和侯阮弘裕奏請。收穫屯田粟。以足國用。○鄧欣、黎訖等。作亂于清華玉山縣地方。二十七日。帝命將領兵。以杜岳贊理軍務。討平之。

丙子。八年。四月。明正德十一年。春正月。時大集軍期。陳公寧竊發於安朗縣晦渡處。二十三日。命東閣大學士杜岳鎮守京城。帝親率大臣文武五府都督扈從軍。出北辰門。御珥河邊行在。號令諸將。渡河進戰。大破之。賊衆大敗。刺殺甚多。仍論將士功。各授以職。○先是。帝崇興土木。築城廣大數千丈。包圍祥光殿、真武觀、金鼓千花寺。入自東邊。至西北邊。橫截蘇瀝江。上築皇城。下爲貢口。以破甌土石搗之。以石片方磚砌之。以鐵橫之。又爲戰紅。使畫工畫圖。命女史裸身。把掉於西湖。帝與之遊。以爲大樂。匠人武如蘇作大棧殿百餘屋。罄竭國中財力。并作九重臺殿。前掘爲池。通蘇瀝江。引水泛天光舟。以縱觀遊。其池縈紆屈曲。開貢口。可運輕舟之出入。以爲逸豫。極其奢侈。民間疾苦。士卒疲勞。五府軍築城。未能成功。至是。勅催京城內外各衙門。應差湊作。填池搬土。

帝每日不時幸遊各處。悅意者賞以金銀牌。已成之再更之。更之築之。年年無窮。築城軍人疫癘。十分之一。○三月大水。○初六日。水棠養真庄純美殿監陳曷作亂。曷見讖云。東方有天子氣。乃陰謀大逆。假稱陳太宗玄孫。光淑皇后外戚。與其子昇及其黨潘乙、即占人名。同利。廷彥、廷藝、公蘊、廷寶、段布等。稱兵於東潮瓊林寺。據海陽、水棠、東潮等縣地方。曷身衣緇衣。軍皆禿髮。自謂帝釋降生。僭號天應。○夏四月朔。陳曷率兵過僊遊、桂陽、嘉林等縣。逼犯菩提津。阻河不得渡。帝親征。御祥壽殿。即瓊雲殿也。號令諸將。東岩伯賴叔懋、廣福伯阮克讓、明武伯鄭洪等。提領官軍。渡河奮戰。到菩提臨賀等地方。帝令發砲三響。諸軍進擊。大破之。曷敗走。回于鄂山。初三日。帝命定郡公憑鎮、延興伯鄭孔昭、富祿伯鄭萼。提領官軍討之。戰數不勝。鎮、孔昭皆陷陣而死。萼被執。曷欲授以

官。萼不屈而死。帝再命安和侯阮弘裕往討之。弘裕領兵住菩提營。○鄭惟慳弑帝于太學門。先是。惟慳以數諫帝忤旨。被杖。惟慳乃與黎廣度、程志森等同謀廢立。整飾船艘器械。在太極津。聲言討賊。初六日。夜二更。將金吾護衛三千餘人。入北辰門。帝聞之。疑有賊至。乃出幸寶慶門外。七日昧爽。有承旨阮瑀從帝間行。過太學門。至碧溝坊朱雀池。帝遇惟慳。問曰。賊在何方。惟慳不答。顧他大笑。帝揮馬而西。惟慳使武士名幸者。橫梢刺帝墜馬。弑之。阮瑀亦死之。將帝屍歸于北使館。以寘衣火葬之。一云。以屍橫馬上。至南門。欽德皇后。亦自投于火。軍士以兩梓宮。回葬于御天之陵。降封靈隱王。御天有光孝殿。在社。后姓阮。諱璫。乃文江鄉管領之女也。阮瑀慈廉天姥人。由中鄉試肆場。善草書。初從應義師。官至兵部左侍郎。帝甚寵幸之。甲戌科會試。年五十八。文禮蹉跌。

已不入選。帝許再入。遂擢第二甲進士出身。未幾。官至刑部尚書兼保天殿東閣大學士翰林院承旨入侍經筵。日夜飲博於內殿。爲世所輕。至是從帝。謂其子曰。食君之祿。當死君之難。亦爲惟慳所殺。

論曰。靈陰烝父妾。短親喪。假兄名奪人國。窮奢極欲。煩刑重斂。殺盡嗣王。干戈四起。時稱猪王。危亾之徵見矣。

○鄭惟慳既弑帝。乃與宗室大臣謀。欲立穆懿王子光治。武佐侯馮邁爭議立錦江王滌長子椅。祥郡公馮穎使力士殺邁於禁中議事堂。遂立光治。時年八歲。纔三日。未及改元。鄭惟岱將歸西都。時安和侯阮弘裕屯兵在菩提。聞惟慳弑逆。遂發憤舉兵渡河。燒京城庸舍。與其家屬子弟。欲圖報效。遂斬武如蘇於京城門外。先是。如蘇出身匠人。以技巧惑帝。濫授都督兼工部。各所時方作大殿百屋。未及畢功。民間切齒。及帝遇

害。如蘇亦棄市。臣民皆指笑。或唾其屍。是日。鄭惟慳與黎義昭。及勳舊宗室大臣。共迎立錦江王長子椅爲帝。時年十四。惟慳、義昭等見弘裕燒毀京城。乃使力士單舉迎帝幸外。歸清華西都城。會盟興起義師。獨黎廣度出降于陳曷。是時城中失守。社稷廢棄。人民入城。爭取金銀寶貨。白檀、麝香、紗羅、紵絲。滿於民間。圖書、胡椒、草香等物。委棄衢路。高一二寸。不可勝紀。壯勇者爭奪金銀。或至三四百兩。劣者亦二百餘兩。官闕府庫。爲之一空。○前歲貢部使兵部右侍郎阮仲達、許三省、阮貴雅等。還至憑祥州。聞陳曷作亂。據諒源地方。道路不通。通事何公勉、杜慶餘。謀將官貨歸于曷。至光緒六年。仲達等誅之。○十一日。陳曷陷京城。僭號天應。臨朝稱制。用黎廣度理國事。時慈廉縣名羅寧社名人。都力士鐵山伯陳真等。糾率舊勇士。并子弟鄉兵五六千人。起兵於黃花市。曷聞

之。乃分道。使潘乙自青威、寶陀而進。真亦由清潭、餘裕而來。真先以兵逆戰。進至射堆。與乙力戰。器械俱盡。乃以小壩擲之。真齒口被跡甚痛。以孤軍難久留。乃夜回駐營于黃花市。時楊保等亦有扶國討逆。曷檄。○十五日。帝自西都城。糾率三府義師。命鄭惟慳。由天關、應天而進。阮弘裕由長安、莅仁而進。正營平富侯阮文慮、永興侯鄭綏。領水步兵並進。直至東京。并移檄郡縣。十九日。帝至蕉園。陳真先士卒。挺身詣行在。拜謁。二十三日。招安山南營副將安信伯鄭熹。提察黎嶺、贊理黎翼。記錄張玄齡等繼進。圍大興門外。曷率逆徒。上大興門樓。麾旗發砲。以禦官軍。少頃見剃髮三叢兵自夢橋進入瑞光宮。鄭熹稍却。將退紅梅洞。遇阮弘裕軍再進入。是時。惟慳領水步諸軍並進。四面圍城。惟慳擊賊。自太極津至東河津。逆徒大敗。鄭熹圍自大興門外。曷閉城自守。惟慳

又圍西北城邊。再遇山西逆賊何公真。率眾逼城。欲誅曷與帝爭立。惟慳力戰。公真敗死。時左檢點黎璋戰陷死于驛望。社名曷開城走過天德江。竄于諒源。二十四日。帝駐在清潭。社名二十五日。良文侯阮時雍與杜岳等奉迎帝上京。二十七日。復位。大赦。以是年爲光緒元年。時光治在西都。後爲文郡公鄭惟慳所弑。及其二弟皆遇害。

論曰。惟慳之惡甚矣。他日假手於人而不得。其死也宜哉。

○夏六月二十八日。太傅雄國公黎義昭。議定捕陳曷父子賞功令。如捉得曷賞五十人。首捕一人。許右都督從一品蔭封三代。不願官者。賜金三百兩。給田二千畝。次捕一人。許都指揮使正三品蔭封三代。又次捕一人。許都指揮使同知從五品。從捕十人。許指揮僉事正四品。又從捕十三人。許指揮同知。如捕得逆曷子。賞二十人。首捕一人。許都督同

知。○秋八月。獲陳曷黨潘乙於東潮縣。檻送京師。斬於東河坊。○命鄭惟愴。節制水步諸營。以御史臺僉都御史范謙柄。釐理軍務。畧定海陽。永興侯鄭綏。安美侯賴叔懋。并軍舉山桂陽人。調步兵。略定京北。由禮伯阮伯俊。歸安集。慈山名府諸縣。伯俊歸至桂陽。為鄉人所殺。綏等進至武寧市橋駐營。○九月十三日。黎義昭再議定捕得偽將賞功令。一捕得偽大將。難賞十人。易賞五人。首捕一人。難許都指揮使從三品。易許都指揮僉事正四品。一捕得偽副將。難賞八人。易賞四人。再定功臣。捕得逆曷及偽職賞功令。并定力勇武士。及俊士功臣子孫。捕得偽將賞功令。○冬十一月。再命鄭惟愴。阮弘裕。與明武侯鄭拱。廣福伯阮克讓。提領官軍。往討陳曷於至靈鄒山崇嚴寺山麓。時惟愴以軍士久勞。逆曷未滅。乃作文以慰勞將士。又使裨將鐵山伯陳真。回京討多士。先是多

士特有功勞。橫衡國中。脅奸處女。逼淫人妻。故惟愴使真討之。時有星隕於營中。惟愴軍進至至靈。名縣與曷夾戰於南澗。裨將名幸死於陣。惟愴見賊挑戰欲擊之。諸將諫不聽。賊又挑戰。惟愴忿怒。分道進戰。身先士卒。惟愴及阮尙。皆為陳曷所獲。至萬劫行館殺之。曷直到菩提。帝命鐵山伯陳真。進討大破之。刺殺甚多。曷遂竄于諒源。不敢復出。以月江為界。真與曷軍相持。曷傳其子昇。僭號宣和。後曷削髮為僧。逃匿得免。今保祿。安樂。周源等村。猶有祠在。意曷死於此焉。

昭宗神皇帝

諱

長子也。

在位七年。

曾孫。

建王。

鐵之。

嫡孫。

錦江。

王永

興陵。○時既板蕩。政非己出。內聽奸諛。外

荒禽獸。昏暗不明。剛愎自用。其也宜哉。

其母。皇后鄭氏鸞。乃清漳丕杲人也。以端慶二年十月初四日。生。洪順八年。襲翼帝遇害。無嗣。大臣黎義昭。鄭惟愴等。迎而立

之。後歸西都。糾率義師。直進至京。逐陳曷。遂即皇帝位。改元光紹。以誕日爲儀天聖節。七年而幸外。莫登庸立弟椿即位。降帝爲阼陽王。統元五年。爲登庸所弑。後追上尊諡。爲神皇帝。廟號昭宗。

丁丑。光紹二年。明正十二年。德春。追尊皇祖建王。爲德宗建皇帝。皇父莊定大王。爲明宗哲皇帝。仍勅禮部尙書譚慎徽。校定廟諱御名。廟諱二十二字。凡臨文寫用。刊書籍。皆不之禁。聲讀皆應回避。連字如徵在之類。不得寫用。○命平郡公阮文慮爲都將。○夏四月。杖殺假天武翟克昌。克昌天施縣仁武鄉効力前衛軍人。於洪順六年。稱曰駙馬降身。未幾又稱天武。至是年正月。出居本社寺。號曰淨涇。乞飯九包。食盡取包葉。燒化爲藥。助良民無子息者。需索鷄酒。救助即効。事聞于朝。差人捉送赴

京。杖殺之。爲其恠誕惑民故誅之。○命太保瑞郡公吳柄爲都將。○以阮文運爲京北贊治承政使司承政使。○五月二十八日。追尊靈隱王。爲襄翼帝。○秋七月朔。安和侯阮弘裕。與永興伯鄭綏有隙。屯兵相拒。先是。阮弘裕。鄭綏。俱往討賊。回于京師。聽子弟反間。遂成嫌隙。弘裕屯于東河坊。綏屯于大羅城外。相守。弘裕稱病不朝。科官阮貫之。奏言。上以廉藺賈寇之事諭之。不解。至是。阮文慮。鄭維岱。俱入御前。奏請講和二入。文慮以密詔。出於袖中。奏言。鄭綏。維岱。以阮瀆子阮淞。立爲僞主。作大逆。於是。捕維岱及右都督黎益。齣。音皆斬之。鄭伯适絞死。以維岱首。梟於鐵山。伯陳眞營外。是日。阮弘裕舉兵。擊綏於京城永昌。曲浦。復古等坊。三戰不克。鄭綏裨將阮世副。中矢而却。綏乃走入清華。陳眞以弘裕逐鄭綏。乃舉兵攻弘裕。先是。惟是。惟陸與鄭綏同族。密剖山西各營子。

弟擊之。是日弘裕入見帝。出自大興門。意有陳真。乃出東華門。頃之下船。避回清華。時莫登庸鎮守山南。陳真有書勸截之。登庸不忍。弘裕得免。初弘裕與陳真戰。時日向暮。有五色雲片出東方。而黃雲飄揚滿天。識者恠之。

論曰。黎朝當光紹時。外寇未平。權臣相攻。交兵闕下。喋血京師。日色黃昏。天雲散落。國祚日衰。兆於此矣。

○詔追尊愍厲公爲威穆帝。○二十八日。殺假天蓬陳公務。公務。嘉福縣人。先是。副將左都督武川伯莫登庸奏言。公務妄行妖恠。誑惑愚民。并劾承憲官黎瓚、杜韜等。信惑邪說。其畧云。竊惟仁義中正。聖人之所常行。恠力亂神。聖人之所不語。稽諸往古。厥有明徵。黃帝撫時。必謹幽明之分。高陽立極。必絕地天之通。是皆揭標的於當時。所以垂龜鑑於後

代。於皇上聖。光啓中興。作之君。作之師。誕任寵綏之責。化以道。化以德。期臻沕穆之休。凡在際蟠。舉皆食息。今天施仁武。軍人瞿克昌。嘉福范松軍人陳公務。類由賤隸。本作齊民。謂宜遵王道。王路之歸。率循嘉訓。却乃假天武。天蓬之號。誑誘愚民。以浮經佛寺。爲賣詐之場。以布拜神祠。爲藏奸之窟。撒灰作藥術行。而老少奔波。呪水飛符計售。而閭閻倒影。顧妖恠所爲若是。宜士夫出力排之。而承憲官等。曾讀聖賢之書。均任師帥之責。當如仁傑毀河南淫祠。以祛他惑。胡穎杖廣東僧人。以斥異端。胡彼凡流。不明常理。黎瓚文運。則迷而不悟。妄狀而信。惑其非。子驥杜韜。則昏而無知。妄本而附會其說。一一同歸於左道。駸駸幾惑於巫風。相惑以恠。相悞以神。既作譎張之態。何做非刑。何度非法。盍嚴懲戒之條。帝從之。○以阮豫爲御史臺副都御史。○冬十一月二十日。以

杜岳爲吏部尙書兼東閣大學士入侍經筵。○閏十二月。誅賊臣黎廣度。先是。廣度降于陳暲。至是。鎮將何飛鶴音阮魯等。捉得解送京師。莫登庸上奏請誅之。其畧曰。三綱五常。扶植天地之棟幹。奠安生民之柱石。國而無此。則中夏而夷狄。人而無此。則衣裳而禽犢。自古及今。未有舍此而能立於覆載之間也。今黎廣度席祖父之餘蔭。蒙朝廷之厚恩。踐歷四朝。列位台鼎。因循一節。殆甚窺窬。要君則百計逢迎。專政則多方賣弄。釀成端慶、洪順之禍。豈一朝一夕之故哉。比年逆暲稱兵。僭干位號。彼乃貪生畏死。忍耻事讐。假名爵而爲逆暲。誑誘愚民。假頭目而爲逆暲。求封外國。狗彘其行。梟獍其心。梟鳥名。獍音。獸名。梟食父。獍食母。人皆唾罵。而彼則冥頑自如。曾不顧君父之厚恩。綱常之大義。其得罪於天地。得罪於祖宗。得罪於天下。在所不赦。今將臣何飛鶴、阮魯等。已捉得正身。

欽奉勅旨。力士拿誅之。初六科十三道。上奏爲大臣臨事變。不能死節。義。事逆賊事。臣等檢得前太師紹國公黎廣度。居相職。不能盡忠。臨事變。不能死節。臣事逆暲。抗拒朝廷。至鎮守營將何飛鶴、阮魯等。捉得解送。果是逆賊之臣。至是罪犯。臣等竊惟天地常經。實在君臣之道。春秋大義。尤嚴亂賊之誅。名分甚明。條章具在。今黎廣度猥承勳蔭。濫典鑑衡。固宜節厲忠貞。思答累朝之眷顧。胡乃行多私僻。竟包一己之奸凶。剛方靡效。韓休。狡險宜浮。林甫。閨門不正。暱聞鄭衛之風。柱石非才力。乏伊周之器。徇私達理。倚法弄權。兆瞰室之災。則鳩林木而廣營官室。樂迷心之智。則執酒壺而徧酌下僚。所急者。問舍求田。所事者。賣官鬻獄。內而府衛各職。盡出其門。外而承憲等官。皆由其手。溪壑縱貪。鑿之欲。旌旗招奔走之徒。腹削閭閻。民窮而不之恤。紊亂綱紀。政蠹而不之

思。上則負社稷□翼之恩。下則隳祖宗箕裘之業。所爲若是。安得智哉。頃因逆曷之僭干。雖効眞卿之慷慨。匡扶國難。則罔揮衛社之戈。顧戀家貲。則欲築藏金之塢。且且敢忘於河誓。昏昏便陷於虜庭。臨變迷就死之方。事讐忍偷生之恥。低頭而拜逆賊。深慚舞象之有知。作偏而諭愚民。殆甚屯蜂之凡蠢。音銀。犬爭聲。然反面。情願也。回爾噬臍。况聖神將欲自新。信厚屢頒於明詔。胡小醜曾無念舊。頑囂滋長於邪謀。負龐萌反漢之辜。踵朱泚背唐之轍。海而洗惡。莫勝浩浩之波。天豈容奸。遽入恢恢之網。何面目而見日月。何言語而對冠紳。忘其親而奪其親。事其主而反其主。臣子不忠不孝失身。既犯於罪魁。刑罰有要有倫。負質。合明於邦禁。又朝臣上奏。爲大臣背國從僞事。臣等糾得前太師紹國公黎廣度。於端慶、洪順之年。包藏禍心。濁亂天下。至逆曷犯闕。不能堅守

臣節。又反北面事讐。顯是背國從僞干。有重罪爲此。臣等竊惟。天地常經。莫重君臣之義。帝王大柄。尤嚴亂賊之誅。况此一鄙夫。有如黎廣度。以斗筲之小器。濫台鼎之重權。竊獻賣官。既構禍於端慶守成之日。逢君獻諂。又促亾於洪順御下之時。忍爲曷可勝言。患失無所不至。十載養天下亂。有同林甫之奸。一朝動漁陽兵。遂致祿山之寇。百姓以之騷亂。九廟以之震驚。固宜報國糜身。贖賣國戕民之罪。顧乃貪生畏死。爲事讐從僞之人。臣事逆曷。累及三年。陰助逆高。殆甚百計。僞詔僞諭。僞勅。封名爵。以誑惑愚民。詭計詭行。詭言。稱頭目。以求封外國。誠犬彘之不若。曾蜂蟻之不如。今謹備奏聞。廣度遂坐誅。○授阮茂海陽參政兼贊理。廣福伯阮克讓營軍務。先是。茂以清華憲察使。回家守制。滿服赴京。時值陳曷構亂。茂不應僞命。朝廷以茂有士望。仍授本處參政并兼

資理未幾。陞太僕寺卿。○是歲。天下大飢。人民餓殍相枕。海陽、東潮、峽山、京北、安豐、僊遊、東岸諸經兵處尤甚。時主少國危。諸將自相雉長。互生嫌隙。鐵山伯陳真。既逐阮弘裕。仍鎮守京師。帝遣左顯鐵城伯及新降將阮公度等將步兵。莫登庸將水軍。追弘裕等。走入淳祐。今收淳祐。避真宗諱。也。官軍掘弘裕父文郎塚。斬其首。弘裕再會兵。與官軍相拒。弘裕因以書并詩。遣莫登庸。登庸得書與詩。遂擁兵不戰。弘裕等遂全軍走還。○定順化漕運官粟。賞功令。凡順化漕運官粟。二遭並動官員。陞一級。賞二資。前力勇武士年深。并己出身。寄回本貫情願。許如出身。除中尉。新選出身材項。除武尉。正八品。分入各衛宿直。文屬有出身。例除知縣。縣丞。若無出身。并軍色民人。除副武尉。從八品。○以黎巖為戶部尚書。
戊寅。三年。明正三年。春。會試天下舉人。取鄧乙。御天縣海潮人。等十七人。

及廷試。問以知人安民。賜吳勉紹、阮敏篤、劉啓顯三名第一甲進士。及第。賴金榜等六名第二甲進士出身。阮度等八名第三甲同進士出身。按阮文泰記云。臣謹按。前朝自大寶三年壬戌開科。或六年一舉。或五年一舉。未有定例。至光順四年癸未科以來。始三年一科。與明國會典。以子午卯酉鄉試。辰戌丑未會試。惟光紹三年戊寅有科者。以二年丁丑歲當大比。而時方有事。至是始舉行焉。

○加封莫登庸為武川侯。○秋七月初七日。天暴風雨雷震。擊人甚多。○十一日。殺鐵山伯陳真。并其黨陳智、阮俄、阮伯達、黎願、欽等六人於禁中。先是。真既逐阮弘裕。權在掌握。莫登庸亦憚之。乃為其子登瀛娶真女。時有好事者。為之語曰。陳有一人。為天下君。兔頭虎尾。濟世安民。以故國舅褚啓、壽國公鄭侑、與瑞郡公吳柄。皆謀曰。陳有一人。即陳真。

也。鬼頭虎尾者。寅之末卯之首也。恐於是年有變。勸帝早除之。時鄭綏復入知金光殿。贊成其謀。至是朝退。帝使召真與弟子陳智。俱入禁中。令人閉諸城門。使力士捉真。真走至城上。守門人捉而斬之。其弟子黃維岳、阮敬、敬後仕莫官至太尉、阮盎等。聞之擊鉦三連。將兵入大興門外。見諸城門已閉。遂直至錦衣衛。敵萬司把門拒之。不得入。帝以兵巡內城。以陳真頭示之。維岳、敬等遂走。十四日。阮敬、阮盎、阮賢、高春時等。一作阮賢共聚于安朗寺。舉兵逼犯京城。帝夜幸嘉林菩提以避之。明馬舉等。賢共聚于安朗寺。舉兵逼犯京城。帝夜幸嘉林菩提以避之。明日幸楊光蓄懿堂。就軍舉家。舉屋在嘉至哺時未飯。民間有以芋餅進者。是時。鄭綏屯兵于山南。得萬餘人。聞帝已幸外。衆遂散。於是山西之兵。肆爲暴掠。城中空虛。京師遂爲漁獵之場。帝因召阮弘裕。擊阮敬等。弘裕猶豫不果行。

論曰。自陳曷入京。而宗廟散壞。自山西作亂。而京城空虛。卽此而知黎朝之不振矣。

論曰。人生有三事之如一。君師與父。豈有異哉。昔張琇表繫於斧。殺人以復父讐。而名顯唐家。郭卜兵入禁中。遂君以救部將。而聲揚李氏。是皆移事君事主之心。爲事父事師之節。豈有他哉。陳真在黎朝。厥功不細。當逆曷僭篡東京。真以一旅之衆。晝夜轉攻之。凡十餘日。而曷之渠魁退走。及逆曷復至菩提。真以數千之兵。渡水奮擊之。會未十日。而曷之徒黨潰散。黎之日月再明。黎之宗廟復祀。其視臣靡之復夏。吉甫之匡周。豈有殊哉。奈何大寇未平。群奸伺隙。暗主聽讒於上。奸母構禍於中。遂至召入禁中。殺及將佐。其視李高宗之殺秉彝。陳簡定之殺鄧悉。有功見疑。無罪被殺。啣冤飲恨。天地不知。豈不

痛哉。合阮敬、阮益而論之。二人以帳下之將。厲復讐之心。篤志除邪。挺身赴難。上以報宿昔之德。下以解忿鬱之冤。扶正氣於億年。殄奸雄於當日。其於事師之道。既明且白矣。然真之為將。不能戒戢左右。或殺名臣於大都之中。或飲御酒於大清之內。甚非人臣之禮。則真之死也。亦由自取。夫何足恠。

○十六日。以吏部尚書杜岳。為御史臺都御史兼東閣大學士。入侍經筵。○以太僕寺卿阮茂。為御史臺劾都御史。○以黎穰為吏部尚書。○八月。太白經天。○京北承政使范謙柄。聞帝幸嘉林。詣行在拜謁。奉命調糧。以給軍食。○帝命恭儉侯何文正。檜溪伯黎大堵。召莫登庸于海陽。帝再幸純美堂。臨朝百官。時登庸至謁。帝擁水軍於珥河。以蓄懿堂稍遠。因奏請再移幸菩提。御純美堂。得便扈從。并使人諭陳真子弟阮

益等。皆曰。鐵山之死。由於褚啓、鄭侑、吳柄之譖。若殺此三人。則君臣如故。無有異圖。帝聽。單舉之計。遂殺啓等。而阮益等益肆暴橫。擁兵不解。○九月二十一日。莫登庸殺御史臺都御史杜岳。副都御史阮豫。時登庸以帝在純美殿。水軍稍近真子弟地方。請遷于寶洲。杜岳、阮豫皆爭之。登庸因使其黨丁蒙。執岳、豫。就春杜行營北門外桑田殺之。武容有詩云。旂旄旂音旂。旄音旄。旌旗旌音旌。旗音旗。掛夕陽。兩宮泛泛駕飛艖。函犀戰士淹江上。腹多忠臣死道傍。萬里鋤菁菁音菁。子音子。蕪也。林有盜。三軍餒。藁無糧。昇龍自古興王地。何不雌雄決一場。時睿見帝及弟椿。泛舟于外。岳、豫等諫死。天下飢饉。士卒乏糧。帝又不居昇龍。而遷寶洲。故有是詩。唐洪德少保向書。進士及第。歷仕至丁蒙奉帝幸寶洲。帝既遷寶洲。永興伯鄭綏。文臣阮瑒。瑒人。與山西諸將共謀立翽。翽之子榜為帝。改元大德。

之榜曾孫也。昌得半年又廢之。而立黎煥。音改元天憲。母弟云煥乃乃庶人也。
未。作行殿於慈廉名縣由芽社。以閭閻人。分置官屬。文武進朝。天憲等既立
文前為順于文前。帝在寶洲。有程志森。阮時雍。扈從。使人諭阮弘裕。弘
裕聞之。乃率清華兵。來赴難。帝乃命弘裕。與莫登庸。領清華。山南各道
兵。分道進擊。阮益。阮敬等。于山西。弘裕大敗。死者甚衆。弘裕走下船。自
度不能克。遂罷兵歸。獨留莫登庸。與阮益等相持。○冬十月。命莫登庸
提統水步諸營事。○遣阮時雍。阮儼。黎懿。吳煥。如明歲貢。并請封。因國
亂後。果不行。○前歲貢使阮貴雅。還自憑祥。以為東閣校書。○帝再幸
嘉林春杜營。○以阮非虎一作惟虎為御史臺僉都御史。武麟定為順
化參政。改命京北承政使范謙柄。行又安承政使。命又安承政使潘廷
佐。為京北承政使。蓋以謙柄京北桂陽人。廷佐又安天祿人。故改命之。

謙柄受命。廷佐不肯就京北。因與謙柄共任又安。○以譚慎徽為少保
禮部尚書。入侍經筵。○遣吏部尚書黎棧。諭祭故都御史杜岳。并賜帛
慰錢一百貫。岳文江。類屋人。字致正。及第。仕至東園大學生。次子縉。莫
大正乙未科。同進士。仕至刑部尚書。茶郡
公。陣亡。岳有詠史帝王唐律詩集。行于世。
己卯。四年。明正德。春正月。帝在菩提行營。鄭綏作浮橋進兵。半渡挑戰。
帝遣大將攻破之。斷浮橋。斬得賊將梅陽伯。綏與黎煥。退歸安朗。安樂
地方。帝又命將征之。綏等夜驚。遂遁走。○二月初二日。勅旨。傳中書。寫
勅命誥命。有姓名奉寫。尚寶奉用寶。○三月至夏四月。天大暑。損禾。米
貴。○太原。宣光源頭。咤賊作亂。劫擄人民妻子財物。○以東閣校書阮
貴雅。為東閣學士。○五月。咤賊衆潰。時值大雨。咤屯于泥淤之地。自是
衆心離沮。無有鬪志。軍遂潰。○秋七月。大雨。命莫登庸提統水步諸軍。

圍黎樵於慈廉。因決水入黎樵軍。樵與阮瑯等走至寧山。即今之安山也。官軍獲之。載歸以徇。瑯嘗徇時有詩云。本欲興周救萬民。誰知天意不隨人。烏江水關難東渡。赤壁風高易北焚。雲暗寧山龍去遠。月明福地鶴來頻。英雄成敗古來有。但恨平生志未伸。○九月二十日。帝還京。大赦。賜覃恩陞一級。封莫登庸爲明郡公。○以東閣學士阮貴雅爲吏部左侍郎。

庚辰五年。明正德十五年。春正月。命莫登庸節制各處水步諸營。以范嘉謨贊理軍務。○是時。武嚴威起兵於長伸大同。屬宜。帝命瓊溪侯武護領軍討之。以范謙柄贊理軍務。○以武容爲少保吏部尚書兼東閣大學士。入侍經筵。○以吏部左侍郎阮貴雅爲御史臺都御史。○夏四月。會試天下士人。取阮弼等十四人。弼父安人。廷試及廷試。上親策問以人才。

賜阮泰拔第二甲進士出身。泰拔錦江平浪社人。有節義。鄧公瓚、阮弼等十三人。第三甲同進士出身。○命禮部尚書兼史官副總裁知昭文館秀林局鄧鳴謙撰大越歷代史記。鳴謙山園人。自號脫軒先生。有越鑑詠史詩集。行于世。○以阮有嚴掌翰林院事。○賜少保吏部尚書兼東閣大學士入侍經筵武睿貞懿功臣。○六月。順化處土酋。逐總兵使端良伯范文訓。掠其妻子財物。時文訓多率子弟從行。易置衛所官。攪擾其民。并私殺丹田縣武舍安傳等社土酋胡伯光等四人。以故。伯光子弟率本處四千餘人。逼圍其城。逐文訓。文訓棄妻子。逃出新平地方。行順化承宣使范謙柄。憲察使吳光祖等。與文訓妻子俱乘船遁。被本處民盡掠取文訓之財物并妻子。固要謙柄。光祖船。逼令還任。後一月。帝命蔡懋德代謙柄。爲順化承政使。謙柄等由是始得還。○秋閏八月二十三日。贈杜岳爲少保尚書、御史臺

都御史文貞伯。諡文節。○以御史臺僉都御史阮茂。爲副都御史。阮貴雅爲吏部尙書。陪侍經筵。

辛巳。六年。明正德十六年春。封莫登庸爲仁國公。節制十三道水步諸營。○以

范謙柄爲禮部尙書。參預朝政。○三月十四日。明武宗毅皇帝崩。無嗣。慈壽皇太后定議。遵祖訓。兄終弟及之旨。爲遺詔。遣文武大臣。迎廣嗣厚熄於興邸。入繼大統。以四月二十二日。卽皇帝位。大赦。以明年爲嘉靖元年。○夏四月十七日。立洪順六年甲戌科進士碑。命少保吏部尙書。東閣大學士。入侍經筵。武睿撰記。中書監典書朱廷寶書。金光門待詔范德貌篆。

按武睿記云。洪順六年甲戌科進士。其恩榮次第。一遵明例。春官請刻碑立于大學。以垂永久。適屬厄運。兵戈倥偬。題名之事。未及竣集。

陛下業茂中興。功光前列。緝熙聖學。而涵泳道源。鼓舞化機。而作新文治。戊寅年春。旣臨軒而策士。庚辰年夏。又制舉而收賢。迄于辛巳。又立甲戌題名碑。以備缺典。以昭激勸。何莫非聖上隆儒盛意之所運用乎。且是科進士。素已隨其器。使成在庶僚。或奉勸於患難之秋。或贊秘畫於治平之際。或修政立事。或視草演綸。其操履才能。亦可槩見。迺今再蒙粉飾。其感激之心。當何如耶。必精白承休。必始終圖報。先器識而後才藝。先德行而後文章。爲景星慶雲。以瑞於時。爲渾金璞玉。以寶於世。爲干將鑌鄒。以平僭亂。爲梗楠杞梓。以壯棟梁。爲菽粟布帛。以濟民生。爲參苓芝朮。以壽國脉。使治躋熙皞。而措天下於泰山磐石之安。方爲上不負聖德之所褒。下不負平生之所學。斯功名事業。垂堅珉於不朽矣。儻或不然。則賢否忠邪之迹。是非得

失之分。豈容揜哉。

○秋七月。帝幸莫登庸邸。加封太傅。○八月。帝幸瓊雲殿。慰勞莫登庸及諸將士。往京北諒源地方。搜捕陳昇。○九月。勅諭莫登庸及諸營將士等。朕聞為國除兇。蹈危履險。將軍之責也。故齊田單。冒矢石。而狄人下。唐李愬。衝風雪。而淮蔡平。是皆衛社稷。有大勲勞於天下。卿朕之所倚賴。今逆昇嘯聚餘黨。竊據諒源地方。朝廷命卿為都將。節制天下水步諸營。分道進討。能跋涉山川。衝冒風雨。破逆賊於鳳眼保祿等縣。燒毀賊營。斬得賊賊。生擒賊俘。凡所經過。秋毫無犯。各社居民。並已首服。捷書屢奏。朕甚嘉焉。特差少保兵部尚書錦山侯黎叔祐。司禮監總太監兼材用庫事黎快。左侍郎東閣大學士阮綱。齎勅諭。慰勞卿及諸營將士。并有銀子一百兩付卿。隨宜賞賜有功。勅至。卿當體朕意。以忠義

激將士。同心協力。設策搜捕。要得逆昇正身。脅從者一切不問。俾積年逋逃之寇。巢穴掃空。一方塗炭之民。按堵如故。以通使道。以畢圖功。則卿之勳名。垂於宇宙。山河帶礪之盟。爰及苗裔。永世無窮矣。是時官軍進至諒源等地方。昇等並走。捕得昇妻與女。誅之。昇走入七原州。昇走。

入明國。後

壬午。七年。○八月。明世宗厚。附恭皇統元元年。春正月。明遣翰林院編修孫承

恩。給事中俞敦。來諭嘉靖皇帝即位。會國亂。承恩等不得達。至癸未年。承恩還太平府。敦道卒。○夏四月二十日。京城盜發。燒燬畿內廂舍。帝命東郡公莫楸。廣郡公喬文珉。與諸將入侍宿衛。楸。文珉等奏請。許弟子列奇在城外。京畿乃得息。○實川侯黎克綱。良富侯黎伯孝等作亂。稱兵於東岸。嘉林地方。莫登庸親率諸將。討之不克。副提領四城軍務。

鄉山伯黎壽。死于陣。後伯孝兵敗。竄于諒源。被擒送京師。初伯孝居鄉里。人以為善。及就擒。鄉村老幼五十餘人。詣闕乞贖罪。不許。殺於東市。梟首三日。○秋七月二十七日。帝幸于山西明義縣。時莫登庸威權日重。衆心歸向。以假女侍帝。名雖進奉。實則伺守。又令長子登瀛。爲毓美侯。掌金光殿。登庸步行。則鳳蓋銷金。水行則龍舟引纜。出入官禁。無所忌憚。并殺署衛阮構。都力士明山伯阮壽。及覃舉等。帝陰與范獻范恕等謀。令人齎密詔於西京。使鄭綏迎接。乃於二十七夜二更。獻恕等入侍宴。奉帝出外。皇太后與弟椿不預知。帝幸山西明義縣夢山。明日。登庸知之。以兵邀截要害各處。二十八日。登庸張旗於京城。令各坊庸舍。毋得驚疑。又使黃維岳等。以兵馬追帝。及於石室。帝以石室兵拒之。捉得維岳。是日登庸入京。釋程志森。阮時雍之囚。初帝以二人附登庸。繫

之於瓊雲殿。未及殺。遂幸外。故登庸釋之。時帝既幸外。登庸乃與太師諒國公黎輔。美郡公黎瑀。錦山侯黎叔祐。宏禮侯范嘉謨。端禮侯楊金鑑。瓊溪侯武護。楊川侯阮如桂。共謀立帝弟椿。其勅諭曰。予德宗建皇帝之孫。明宗哲皇帝之第二子。光紹皇帝之親弟。茲以光紹七年七月二十七日。夜。時光紹皇上被奸人脅遷于外。朝臣太師諒國公黎輔。太傅仁國公莫登庸。及公侯伯駙馬都尉。文武臣僚。同心推戴。謂黎民不可無主。神器不可久虛。同請于予。纂承大統。予以宗社生民之故。義不容辭。已權勾當官中各務。內外文武臣僚守職如故。護衛及在京諸營將士。嚴加宿直守衛如法。奉天府及各府縣社員人。安居樂業。以保定全之福。三十日。黎瑀。阮如桂。奉椿。嘉。不行。乃急差軍民。築錦江壘。以守北江。副都將福山伯何飛鶴。平湖伯嚴伯驥。福源伯

阮熾、扶興、伯范在等。先受光紹帝密詔。并撫諭文。乃率北江子弟。各駐兵於東岸西橋江。臨川伯譚慎徽、掌翰林院阮有嚴、楊楷皆在焉。登庸督諸將。與飛鶴等相持。登庸誘范在爲嚮道。伯驥等並北走。時文臣阮秉和、范正華、阮拔萃、褚師董。共就桂陽縣覽山社。與范謙柄謀。從光紹帝。見謙柄已在飛鶴營。知事不成。乃共來謁椿。○八月朔。登庸與黎輔等。率群臣。共奉皇弟椿。卽皇帝位。詔曰。天之立君。所以爲民。君之奉天。所以惠民。我大兄光紹皇上。祇荷天休。丕承祖烈。撥亂反正。布德安民。七年于茲。今年七月二十七日夜。時被姦人脅遷于外。朝臣黎輔等。以朕明宗哲皇帝之第二子。光紹皇上之親弟。同心推戴。再三勸進。朕以宗社生民之重。固辭弗獲。乃祇告宗廟。以今年八月初一日。卽位。改元統元元年。大赦天下。凡三十二條。○初十日。統元帝幸海陽嘉福縣福

延社檜廟。又幸洪市。遂作行殿于縣中。裝載城中府庫金銀錢貨。全歸之。○十一日。光紹帝自夢山行營。發還京城。駐于芒山社。大風二日。吏科給事中阮克綏入見。帝命力士斬之。先是。帝召克綏。克綏見帝幸外。不肯就。有傲色。至是入見。故斬之。因發行過恭儉江。橋折陷江中。黃袍乘輿並濕。命拿國威府楊廷秀等。責以假作橋梁之故。後又放之。十六日。御瑞光行殿臨朝。百官四方響應。臨川伯譚慎徽、副都將福山侯何飛鶴等。受密詔歸北江起兵。又有王譚侯黎永、何里侯黎廣等來見。寧川侯黎廷秀。在山南下伴亦應之。復令廷秀。湊本縣并所屬諸營分兵。鎮守於濶渡、寧江、義禮等社要害處。後爲登庸所破。廷秀爲子弟所捉。到登庸營。仍解送回洪市。在行殿。統元帝以廷秀有舊勳勞。止令絞死。光紹帝遣阮敬、黎永、嚴伯驥、喬伯謙、阮熾等。分道進討於嘉林、文江、唐

豪、錦江、良才、嘉定等縣相持閱月。勝負未決。時光紹帝在瑞光行殿。使中使召鄭綏於清華。往返凡三四輩。綏見帝在瑞光。不聽諸將信任。群小稽遲不赴。時西南北等處。光紹帝已有之。莫登庸分水步諸營。犯東河津各處。光紹帝命賴叔懋、阮餘歡、阮定、譚克讓等列營鎮守相持。爲登庸所破。叔懋、餘歡等兵稍却。興賢等四人擁楯持鎗。由復古坊直入瑞光殿。時光紹帝當視朝。總知鄭恩奏曰。兵已逼矣。帝乃移出。頃見興賢等突入殿庭。護衛人拒之。帝乃避出。駐于仁睦舊亭。民間爭以米粥進。百官倉卒潰亂始集。是日申時。幸慈廉縣天姥重光寺。○九月二十日。光紹帝再引兵還京師。駐于京城之西。即慈廉縣作行殿以視朝。立太廟於城之東。○冬十月初三日。遇宣慈皇太后忌辰。光紹帝詣太廟行禮。過安決橋。侍候人侍扇。失脚陷于江中。初四日。遇儀天聖節。百官

進慶賀表文。經數旬。鄭綏將清華三府并各處將士萬餘人。來護駕。再回本營。綏屬將阮伯紀入侍。范田恐其爭權。因奏斬之。以首詣營門。綏以是忿。始有異志。○初十日。天雨蝗虫。十三日。光紹帝親祈于天。其奏告文曰。茲以國步遭屯。天災示警。秋禾就熟。適被蝗虫。夏務興功。又遭旱熯。既失三農之望。恐貽兆姓之憂。臣久在播遷。第深勤恤。念休徵之未應。由疵政之未除。或忘邪並進。而未知用舍之方。或刑罰不中。而猶多僭濫之失。或人命橫罹於鋒鏑。或民財重困於征徭。以至秉國政者。或乖調燮之宜。董帥閫者。或肆貧殘之態。所以陰陽失序。災沴屢生。焦勞深切於疾心。寅畏遽伸於懇禱。伏望曲從民欲。妙轉化機。俾甘雨旁施。惡虫盡去。四野載芟。載柞。不愆播種之時。百穀實好。實堅。咸遂登豐之願。盜劫適聞。屏息。邦家聿底謐寧。臣不勝懇禱拜祝之至。○十七日。

有黃赤氣。又有散彩黃色。蔽天在東方。○十八日申時。鄭綏、鄭惟悛等。陽言勘平地處二營。鎮守於驛望社。至暮駐營。明日侵晨。綏與惟悛等。伏兵驛望。發砲三聲。率眾大噪。光緒帝倉卒不能制。乃退入宮。綏等因脅帝。回清華。國子監司業黎孝忠死之。於是天下失望。○十一月十二日。定山侯江文裕起兵于清威、山明、懷安、彰德等縣。清潭、上福、富原諸縣人民皆應之。蓮湖伯黎文福告急于莫登庸。登庸猶畧定京北。差裨將討之。喬文琨由富原進入清威。梅川侯黎伯驪由清潭進入彰德。東山侯莫樞由清威進入彰德。四面夾攻大破之。長驅一夜。至山麓而還。○十二月十八日。統元帝自洪市行殿。進發還京師。二十二日。就菩提行在。朝百官。

恭皇帝

諱樞。又諱慶。聖宗之曾孫。建王鎖之孫。錦江王淵之次子。國子監在位五年。壽二十一。爲莫登庸所弑。葬華陽陵。○時國

祥既去。人心已離。才素中下。其能靖乎。
帝乃昭宗同母弟。以端慶三年七月二十六日生。光緒七年昭宗出外。莫登庸因立爲帝。以生日爲欽天聖節。逮登庸篡位。廢爲恭王。與皇太后俱遇害。後追謚曰恭皇帝。

癸未。統元二年。明嘉靖二年。春二月二十九日。帝在菩提行營。朝百官以前年壬午例。有鄉試。因國亂未有開科。乃詔山南、山西、海陽、京北、四政各士人。共就嘉林春杜洲應試。一云。河。中。洲。以丁貞、黃踪等爲提調、監試。其試法分爲四區。四政共發一題。以王茂淵爲第一。即王希也。○會試天下舉人。取陶儼等三十六人。廷試。上親問以君師之道。賜第一甲黃文贊、阮詮、阮道貫三名進士及第。第二甲段廷章等八名進士出身。第三甲阮畜等二十五名同進士出身。新貢士范楚玉、王希曾亦預選中。○莫登

庸使其黨山東侯莫極、瓊溪侯武護、陽川侯武如桂等擊鄭綏于清華。大破之。綏因迁光紹帝于源頭。○封阮時雍為良文侯。時雍有二女。一進於統元帝。一適莫登庸。後封為通郡公。時雍文江縣人。○三月十六日。禮部尙書丁貞奏。乞行諭祭。并加封各處祀典神祠。該一百十三祠。○夏六月。封雉山侯喬文琨為廣郡公。○秋七月二十六日。以生日為欽天聖節。○八月。蝗。○莫登庸廢光紹帝為陀陽王。○以東閣大學士阮貴雅為吏部左侍郎。

甲申。三年。明嘉靖三年。春。帝在菩提行營。進封莫登庸為平章軍國重事。太傅、仁國公。○莫登庸使其黨莫極領兵擊鄭綏于清華源頭。○以阮貴雅為御史臺副都御史。○秋八月。作考試閱選場。在神武殿前衛直廬。○造戶籍田簿。○冬十一月二十四日。奉加封列聖睿號。帝后各一字。

○贈故鐵山伯陳真為郡公。封其子陳實為弘休伯。初真為奸臣所譖。與子弟六人俱被殺。至是帝知其忠。故贈之。

乙酉。四年。明嘉靖四年。是年地震者二。○夏六月。大旱。○十五日。月食。○冬十月初九日。莫登庸經行各處。自為都將。總率天下水步諸營。擊鄭綏于清華源頭。二十八日。未時。接得光紹帝於清都府。良政州翠舉冊高山安仁洞。十一月朔。光紹帝回到東河。十二日。光紹帝在二等御舟所。時早未朝。軍士集於行在門外。婆染處。十九日。大赦。其詔文曰。帝王去暴安民。聿大春秋之統。人君施惠行慶。盍弘雨露之仁。道合弛張。化覃普率。我國家乘時啓運。應天順人。太祖高皇帝創業開基。極生靈於水火。太宗文皇帝立經陳紀。奠國勢於金湯。端本洪源。深仁厚澤。聖宗厚皇帝內寧外撫。戡以武。守以文。憲宗睿皇帝位踐禮行。顯哉謨。承哉烈。

神傳聖繼。矩製規重。共和思衍於周休。屯否偶遭於漢厄。洪順光紹之際。國步多艱。陳曷鄭綏之徒。亂階大釀。擾擾豺狼肆毒。嗷嗷鴻雁哀鳴。予以德宗之孫。明宗之子。惟義與比。俯從百官之樂推。視民如傷。甚憫群生之久困。欲底戢戈之效。載稽推轂之文。特命都將太傅仁國公莫登庸。總率天下水步諸營。聲罪致討。節制之兵。方鷹揚而虎闕。逋逃之衆。已蟻潰而麕驚。曷綏脫喙而速亾。敬益捧頭而就戮。克慎餘歡之輩。須曳劍斷於天關。公侃廷瓚之流。頃刻兔窮於良政。當此純陰月季。接得阬陽王歸。東西南北攸同。諒無思而不服。溥博淵泉時出。宜敷政以在寬。合行事宜。左方用列。於戲君體元而發育。茲同天地之生成。民敏德而協中。尙挽唐虞之熙皞。布告天下。咸使聞知。○十二月十五日夜。雷震。十七日。月食。○以楊金鑑提領四城軍務事。封端禮侯。○莫登庸

殺福良侯何飛鶴等。時飛鶴等聞莫登庸已逼光紹帝。解散北竄。爲其徒紫岳伯。執送京師。縊殺之。飛鶴既死。嚴伯麟與阮熾。竄死於諒山文淵州。譚慎徽以前日奉使詣程。常馳告阬陽王播遷。亦竄死。阮文運。阮泰拔皆死義。阮有嚴竄三農。後檻送京師。車裂以徇。并推殺其子。楊楷後亦檻送京師。釋之。黜爲廣南承政使。死於任所。楷善於詼諧。人皆鄙之。獨范謙柄能告出謁。黜爲戶部右侍郎。阮茂常從光紹帝回清華。及光紹帝爲登庸所逼。茂竄身回京待罪。帝將殺之。范嘉謨爲愛其才可任言諍。乃釋之。尋貶爲宣光承政使。未幾。再保爲御史臺都御史。

丙戌。五年。明嘉靖五年。春二月十二日。帝幸西京。光紹帝預焉。命端禮侯楊金鑑留守東京。○三月十五日。月食。○定扈從留守二十四條。○夏四月。會試天下士人。取范廷光等二十人。廷試問以聖哲之理天下。賜第

一甲陳必聞、阮文猷、劉忠允三名進士及第。第二甲黎光貢等四名進士出身。第三甲范廷光等十三名同進士出身。陳必聞、安老、縣月、益社、伯、父。○秋七月十五日，定公選任命。御史臺都御史阮茂奏：「一管軍則有衛司所等職。管民則有府縣州等官。選任之方，不可以不公也。伏乞繼今前項職有缺，該長官具奏，送吏部照缺銓除如例。若某員人猶有具本堪保，并應除者，吏科駁停其本，以示選任之公。」○八月，令上洪、下洪、荆門、南策、太平等府築海陽真金堤。○莫登庸殺進郡公阮領，領娶莫登庸之妹璉，偕封慶豐公主。領又娶妾十人，璉遂訴領樹黨書，故殺之。因以璉歸于良溪侯裴塔，後封臨國公。時侍書阮詮本娶領女，及領見殺，詮亦出其女。○初六日，以御史臺副都御史阮貴雅為吏部尚書，陪侍經筵。○九月二十一日，御史臺都御史阮茂等奏：「一贊理記錄將

臣吏有軍功，已具本應引選定，為逐項以次銓除。牧民首領等職，若不合資格者，除中尉百戶等職，以息冗濫之弊。」○冬十二月十八日，太傅仁國公莫登庸令沛溪伯范金榜密弒光紹帝于降所，因以梓宮回葬于清潭之永興陵。

丁亥，六年。元六月以後，莫登庸。嘉靖六年。夏四月，遣松楊侯武有、蘭川伯潘廷佐、中使杜孝悌等持節旄，齎金冊，烏龍冠服，玉帶紫轎，畫扇紫傘，往宜陽古齋，進封莫登庸為安興王，加九錫。登庸迎接於新明安，挿渡。○五月初一日，司天奏日食不驗。○初五日，頒扇御製周公輔成王詩，祐命周家實自天，勤勞佐治任仁賢，潛邪肯為讒人設，忠孝終存實德堅，禮備樂和平，定日政清刑措，睥熙年，休風今聞光千古，景行高山尙勉旃。○莫登庸自古齋詣京師，入拜見，自東華門出，大興門，是日有小雨。十一

不道。靈隱之篡弒得國。陀陽王之內亂見迫。恭皇帝之天祚已移。果何爲哉。

莫登庸

位三年。後僭追尊號爲太祖。

登庸宜陽古齋人。幼以漁爲業。及長有勇力。考中力士出身。洪順間。陞都指揮使武川伯。歷仕三朝。統元間。位至大師仁國公。後封安興王。陰結朋黨。內外協謀。人心歸附。遂行篡弒。假詔稱禪。而卽真矣。

○是月。登庸入昇龍城。居正殿。

登柄評曰。本紀言莫氏代黎。蓋以明夫篡逆之端。當此之時。舉朝諸大臣。皆注目閉口。面面相窺。向使黎朝中有一人能仗義。與黎家出力。誅逆禁惡。以討叛臣之罪。則其興復社稷。猶可圖也。胡乃甘心守

職。依憑寵祿。以苟富貴。圖免其身。反縱小人。陰贊默教之謀。助成其勢。以求榮顯。使莫氏日益驕弄。得以自專。上旣無君臣之分。下自萌篡逆之心。戀爵固寵。壞義捐忠。行若狗彘。罪惡彰聞。其視古之諸賢則遠矣。于斯時也。權奸勢大。臣下異心。天子孤立於其上。舉朝無一人可托。欲無傾覆。豈能得乎。卒使翻成光紹。統元之禍。逼脅人心。遷帝于荒丘。奪取黎朝天下。僭稱位號。居于黃屋。狡僞多端。以海陽一隅之地。稱爲陽京。自廢黎朝陵寢。誅戮前代功臣子孫。迹其所行。與曹操無異。可勝痛哉。

○登庸封其宗室莫名爲靖國公。中官阮世恩爲蒞國公。唐安縣人。慕使居輔弼左右。臣民失望。天下惶惶。登庸恐人心懷舊。久復生變。乃遵守黎朝法度。不敢廢置。撫諭臣庶。鎮塞人心。掩其耳目。謀假求功臣世家

子孫。於是人多逃竄山林。或隱匿姓名不出。或羣聚爲劫黨。或去臣於外國以偷生。莫知所從矣。

戊子。莫借明德二年。嘉靖七年。春正月。是時登庸欲更立新政。乃令鑄舊年號樣。圓法通寶錢。多不能成。後復鑄鉛鐵新色諸間錢。頒行天下各處。使之通用焉。

登柄評曰。前年莫氏雖已受禪。猶書黎朝統元六年爲正。自茲以後。黎朝無年號可紀。乃以莫氏明德年號。分註兩行。不得書正統。以明篡僞也。至癸巳年。莊宗復起兵于哀牢。國中雖未盡復。然以正統書之。蓋以明夫君臣之分如此也。

○二月。登庸以阮國憲爲駙馬都尉。太保臨國公。賜姓莫。莫國楨爲太師。麟國公。莫廷科爲左都督。謙郡公。少保通郡公。阮時雍。萊郡公。陳棐。

淳溪侯。屈瓊玖。慶溪侯。阮秉德。宏禮侯。范嘉謨。蘭川伯。潘廷佐。道川侯。阮文泰。文達。伯。阮茂。崇禮。伯。何景道。沂川伯。莫益徵。興殷。伯。阮鐸。祿。憲侯。阮狄。文場。伯。范正誼。文斗。侯。阮專美。河汾伯。阮度。蘇川侯。黎光賁。文寧侯。阮典敬。及中官掌監。阮厚廉等五十六人。皆陞秩。賜爵有差。○登庸使人往燕京。告于明人。謂黎氏子孫。無人承嗣。囑使大臣莫氏。權管國事。統撫民衆。明人不信。密使人往探訪國內消息。詰問因由。陰求黎氏子孫以立之。莫人每以文詞華飾對答。又多以金銀賄賂。及使回密告。謂黎氏子孫既絕。弗能嗣。政委托于莫。國人尊服歸之。乞少恕罪。明帝罵不許。登庸恐明人問罪。乃謀割地納歸順二州人民。及金銀二。并寶珍奇貨異物。明帝納之。自此南北復通使往來。○冬十月。登庸以承平之後。制度稍弛。意欲更張振作。乃命其臣國憲等。議定兵制田制。

大越史記卷之六
本紀實錄卷之六
祿制。及置興國、昭武、錦衣、金吾四衛。并五府內外各衛所。所屬各司。司號官名。及各衙門員數。人數。兵數。倣如前朝官制。依例編補充之。乃以海陽處鎮兵。屬歸興國衛。山南處鎮兵。屬歸昭武衛。山西處鎮兵。屬歸錦衣衛。京北處鎮兵。屬歸金吾衛。分補各司。每司置指揮使一員。指揮同知一員。指揮僉事一員。忠校十員。忠士一千一百人。分爲二十二番。宿直。如有功勞。除千戶。統制。管領。中尉等職。每衛置書記一員。用前記錄出身。如除首領牧民各職。其忠士照例分番。每番分爲五甲。每甲置甲首一員。本司官擇取忠校的當者。具本除授。

己丑。莫明德三年。時黎朝舊臣鄭順、鄭昂兄弟二人。奔告于明。莫氏多用賄賂於明。沮之。事未能濟。皆死于明。○時清華右衛殿前將軍安清侯阮淦。宋山沛人。一等。率子弟奔哀牢。國主乍斗以爲唇齒之邦。給

以岑州人民及土地歸之。由是畜養士卒。招亡納叛。陰求黎氏子孫立之。以圖恢復。○莫開會試科。賜杜綜。文江縣人。阮沆、阮文徽三名進士及第。阮雲光等八名進士出身。阮有煥等十六名同進士出身。○冬十二月。時莫登庸篡位三年。自以年老。乃以位與其長子登瀛。自稱太上皇。出居祥光殿。以漁爲業。遨遊自樂。

莫登瀛後。登庸之子。即位十一年。

庚寅。莫大正元年。春正月朔。莫登瀛僭位。大赦。改元大正。○時清華人黎意。以黎氏外孫。憤莫氏篡僭。乃起兵于郴州。復稱光紹年號。人多歸之。旬月之間。郡縣響應。兵至數萬餘人。乃與部將黎如璧、黎伯造、何公僚、黎宗舍、阮曷等。布列營寨。分置奇隊部伍。起砲令。揚旗號。屯兵馬江。於是遠近豪傑。咸以爲黎氏復興。相與奮發趨附。不數年間。軍聲大振。

東人名雄山者。得罪於莫。乃自將子弟數百人。竄入清華。創立營柵。據守數月。登瀛使將擊之。舍於玉勳村。病卒。兵乃亂。

壬辰。莫大正十三年。明嘉靖十一年。春。莫開會試科。賜阮倩。青威郡公。後歸命黎朝。倦之舒。

裴永、吳山快三名進士及弟。阮廸康等六名進士出身。阮良弼等十八

名同進士出身。○莫令禁內外各處。不得持鎗。及尖刀干戈兵器。橫

衝道路。違者許法司捕捉。於是商賈及行人。皆空手而行。夜無盜劫。放

牧不收。每一月一點視。或有生產。不能識其家物。數年之間。道不拾遺。

外戶不閉。屢大有年。境內稍安。○冬十月。登瀛勅賜中人忠厚侯。缺姓名。弘

縣化。為大將軍。使領兵統管清華三府。同三司官。總鎮一方兵民。西安

伯黎丕承。安定縣人。香市人。譜曰。愛州之地。山川險峻。地勢肥饒。兵糧富足。且權

宜分不宜專。若專之。必致禍亂。倘有變發。恐後難制。此地非朝廷之有

也。臣願詳察。毋為後悔。登瀛乃復分清華為二。瑞源、安定、永福、東山、錦

水、石城、廣平七縣。委黎丕承管統之。與忠厚侯相為控制。及丕承得權。

乃自益驕縱。卒生變心。○是月。彗星見東方。○十二月。黎朝舊臣安清

侯阮淦。尊立昭宗之子寧于哀牢。初淦在哀牢。養兵蓄銳。使人往國中。

遍求黎氏子孫。乃得昭宗之子寧。尊立為帝。改元元和。是為莊宗。以正國統。

於是。西土豪傑之士。多歸附之。帝拜淦為太師興國公。及諸將佐。皆以

次受封。凡軍民事無大小。悉皆委之。日夜協謀。共圖興復。

登柄評曰。黎朝不幸中衰。至此極矣。故愚嘗曰。莫氏者黎朝之叛臣

也。至黎帝即位于哀牢。始以正統紀年。以明君臣之分。正大綱也。是

時莫氏奄有其國。而不以正統書之者何也。蓋莫氏臣也。黎帝雖即

位于外。沒迹隣國。會無寸土一民。而獨以正統書之者何也。蓋黎氏

君也。抑嘗考之。古人有言曰。天下者非一人之天下也。粵昔炎帝啓封南國以來。歷代明王賢主。有攻守而併吞之。有傳授而世守之。皆繼世而王。以有位號。乃以正統書之。曰本紀。曰正紀。曰前紀。後紀。曰中紀。末紀。皆其順而已。至若悖逆篡弑而強自立。雖有各號稱者。皆名不正。言不順也。則編之爲附紀。是其逆而已。世降而下。亂起紛紜。迭有興廢。不必言之。自趙越王之起。則本前李南帝之臣也。繼南帝以有其國。而後始卽政稱王。以其臣能代君行政。如此順也。丁先皇平十二使君之亂。而併有之。少帝微弱。弗能禦敵。以國事委之大將黎桓。而黎桓承丁后之傳。以有天下者順也。及李之代黎。陳之代李。以有位者。皆其順也。然則趙黎李陳之四君。皆乘國中無主。或因群臣所請。或因女主之傳授。國人之尊服。天與之。人歸之。以有天下。皆

其順取以有之也。於莫則不然。觀其所爲者。登庸不過黎朝之一大臣也。當黎朝主弱臣強之際。登庸能師古昔之聖臣賢相。尊主庇民。如伊尹之輔太甲。周公之輔成王。其彰彰然偉績。庶可嘉焉。何不效此。而寧反其道。是未免逼主稱禪。篡國弑君。以圖自立。及其有國也。殆六十七年之間。所謂成如王莽。終不免誅夷。實於漢之曹。於陳之胡。皆其迹也。是愚所謂其逆取而有之也。故不得書爲正統也。幸賴黎朝舊勳宿將。克全大節。同心修輔。協贊匡扶。以濟艱難。是天意有以待夫。今日之君臣。厲志圖回。恢復舊物。故能再造中興。混一輿圖。重新社稷。誅奸雄之殘虐。正日月於當天。以大其一統也。故於此特書之。詩云。黎祚重興。舊物回。藍山復見。舊樓臺。君臣道合。斯爲美。政治欣觀。萬國恢。此之謂也。

右黎紀始太祖戊戌。歷恭皇丁亥。凡一百十年。併與莫僭自戊子至壬辰。凡五年。通計一百十五年。

大越史記本紀實錄卷之六終

152
10
34

152
5
34

